

四庫全書

集部

欽定四庫全書

集部  
忠肅集卷四

詳校官編修<sub>臣</sub> 槐

中書<sub>臣</sub> 劉源溥覆勘

總校官檢討<sub>臣</sub> 何思鈞

校對官編修<sub>臣</sub> 沈清藻

謄錄監生<sub>臣</sub> 施 華

欽定四庫全書

忠肅集卷四

明 于謙 撰

南征類

兵部爲處置邊務事內府抄出鎮守廣東印綬監右監丞阮能題據廣東都司呈奉左副總兵征蠻將軍都督武毅劄付節該欽奉勅已勅廣東左副總兵都督董興今秋統率大軍會同爾等腹背夾攻勦殺前賊欽此除欽遵外劄仰轉呈都督董興欽遵施行等因備呈到臣

會同左副總兵右都督董興巡撫兵部左侍郎揭稽巡按監察御史周文郁都布按三司左布政使戴弁等計議查得廉雷等府所屬化州并石庫遂溪電白海豐香山一十三處及廣西福建梧州漳州二府節次報到山海賊情緣各處猖賊先已委都指揮等官孫旺等提督將調去官軍一萬二千五百餘員名分布各處地方守備要害遇警飛報策應有都督孫旺指揮徐寧林清等官軍節次殺獲賊功已經會題及海洋聲息不次行移



備倭等官指揮杜信等嚴督潮州等府州所縣多調官  
軍牌兵民壯人等追捕前賊未報近該監察御史王允  
奉勅到來體勘賊情會合兩廣總兵今秋夾攻已行三  
司開報前項賊情并哨備官軍數目外臣等慮恐各處  
哨守官軍不敷又議添調官軍一千員名推委都布按  
三司都指揮等官胡英等總領前去陽江等縣原報賊  
處相機撫捕去後今該前因緣照廣東衛所官軍調撥  
哨備山海地方并廣西策應之外見在精壯官軍數多

况兼賊情不息都督董興未敢輕去廣西會兵夾攻除將選到廣州左等衛所官軍操候今秋勦捕肇慶等所地方猺賊外緣係處置邊務事理具題該通政使司官奏奉聖旨兵部知道欽此欽遵抄出到部查得近該鎮守廣東左監丞阮能題該監察御史王允案驗節該奉勅廣西潯梧柳慶等處盜賊連年生發流劫鄉村殺掠民財邊民受害朕甚憫之近言者謂必得廣東調兵與廣西總兵會合夾攻庶幾可滅前賊今特命爾往彼即

便會同彼處鎮守巡撫內外官員著令都督董興量調  
大軍前去廣西會合都督僉事武毅等將應有賊寇逐  
一勦滅其董興等不許似前推避欽此欽遵會同查得  
廣東肇慶府等處賊寇出沒劫殺人財不絕若將董興  
調去廣西殺賊見今廣東所屬地方賊勢未寧難便動  
調等因具題抄出本部爲照廣西賊勢十分猖獗其望  
廣東救兵之來如解倒懸之急及照廣東見有都指揮  
梁興湯節孫旺等分布各屬守邊殺賊已經奏奉聖旨

是欽此欽遵去後今抄前因叅照所奏情詞非惟董興  
逗遛不肯前去廣西會兵殺賊抑且原調官軍意在不  
行依期發遣似此故違勅旨偏執誤事所奏難准合無  
行移該府差人馳驛齎文與董興查照原今議奏并欽  
遵勅旨整搦所選官軍并器械等件齊備令驍勇慣戰  
頭目統率候今秋親自督師仍先與武毅等剋期定於  
某處會合將各起賊寇乘機勦殺以除邊患以安人民  
具實回奏其廣東打劫賊徒亦要上緊殄滅不許故意

玩寇貽患以圖後日藉口因而兩不得濟致誤軍機自  
取重罪仍行武毅候董興等官軍到來亦要躬親統率  
官軍會合和同計議相機行事各圖成功不許自相矛  
盾失誤期約如違責有所歸緣奉欽依兵部知道事理  
具題景泰三年六月初九日奉聖旨是欽此

兵部爲賊情事內府抄出鎮守湖廣內官梁還等題據  
湖廣都司守備武岡署都指揮僉事范真呈據武岡所  
州將撫過蘭牛等洞二十二寨及生拘不服招撫上下

岸頭等二十四寨開申到職已經呈報及劄仰撫諭去後續據結申原撫蘭牛扶城等寨仍復爲惡共四十餘寨其各洞卽今缺食糾合廣西都廩等寨分一槩不時四散出沒各路從溪儀山道每於日晚劫虜財畜及至各處告報隨調前去路徑往復四五十里至六七十里又且官軍止可一二更追趕苗賊奸詐連夜退遁去訖其餘出劫去處缺軍分捕緣守備官軍餘丁見在雖有三千員名止是充數而已中間老弱疾懦不堪者多於

中選揀不上一千六七百員名堪調兼且守護王國城池調度不週見今苗賊滋蔓殺虜人財燒毀房屋彼衆我寡制敵不敷欲便盡數調撥係干守護地方及武岡州見在倉糧止有四千一百餘石呈稟暫於長沙等四衛原征官軍量調一二衛前來協助調用候大軍勦其巢穴寧息之日仍聽回衛便益等因具呈到臣叅照呈稱苗賊仍復爲惡殺虜人財燒毀房屋軍寡不敷要於長沙等四衛量撥官軍協助調用具題又該梁還等題

據寶慶府該武岡州新寧縣申景泰三年五月初四日  
據民人羅真狀告本月初三日被蘭牛扶城等苗賊約  
有五千餘徒各執鎗刀出劫長湖等處搜山捉虜男子  
陳華傅子興男傅成保等入洞去訖實被苦害不能安  
生告乞備達撥調官軍勦捕等因到縣叅照所告係干  
賊情備申到府行間又據寶慶府民人陳勝等告本年  
五月初三日仍被蘭牛苗賊約有二十餘徒各執鎗刀  
張打旗號出劫本縣地名長湖金田等處四散搜山捉



虜男子姚五子等家財等項盡行劫去將被劫情由并  
虜去男子姓名開狀來告乞爲轉達調撥官軍勦捕等  
因到縣係干賊情據申到府除申備禦湖廣署都指揮  
僉事范真及行寶慶衛并本府同知瞿福璘嚴督官軍  
民壯人等提備哨捕截殺外具申到臣叅照前事係干  
苗賊出劫捉虜人口事情具題又該梁還等題據湖廣  
按察司經歷司呈景泰三年五月二十八日該寶慶府  
牒呈本月二十日據武岡州新寧縣申前事本月十七

日據扶陽一都人李慶告先於正統十四年七月內被苗賊出沒劫虜家財人口燒毀房屋禾倉人口驚移前來本州安樂地名獨峰寨赴食耕種田土與同本州儒林鄉民楊正茂及附近軍民李友勝等就彼修築獨峰寨潛住往來邀殺賊徒報官外不期景泰三年五月十五日五更時分被苗賊約有五百餘徒前來攻破本寨殺死虜捉男婦共一百二十四名口被火燒毀房屋禾田劫去家財牛羊孳畜俱各無存內認得蘭牛等洞苗

賊雷文可雷仲文雷通昌等若不狀告係干殺虜人口  
數多節被滋蔓出劫不能安業據告得此叅照所告係  
干賊情具申到府行間又據武岡州申爲邊務事抄蒙  
本府批文差火夫曹景文到州該抄蒙湖廣按察司副  
使呂困白牌前事仰照牌內事理即便查勘地名即今  
賊情有無生發出沒明白具申星馳回報施行蒙此依  
蒙查節據楊通希告係儒林等鄉里長楊仲均等下  
軍民籍景泰三年五月十五日被城步蘭牛等洞苗賊

八百餘徒前來攻破獨峰寨將各家男婦殺死一百二十名虜去男女二十三口牽去耕牛一十三隻家財豬畜不開外放火燒毀本寨等因到州已經通行申報去後今蒙前因備申到府又准本府同知瞿福璘關同前事叅照係干苗賊出沒殺虜人財事理除申呈備禦湖廣三司委官署都指揮僉事范真等官及行寶慶衛并本府同知瞿福璘嚴督官軍民壯巡司官兵人等設法隄備哨捕截殺外備申具呈到臣叅照前事係干苗賊

出劫殺虜人口事情具題該本部官俱欽奉聖旨兵部知道欽此欽遵通抄到部叅照所奏係干苗賊節次出沒流劫地方殺掠人財重事又況武岡州見王國在內所宜加意防護及查得先該湖廣三司等官具奏武岡州并新寧縣節有苗賊侵擾本部已經不次覆奏行令彼處總督總兵等官右副都御史王來保定伯梁瑄等調度官軍設法撫捕去後經今日久而前項賊盜日甚一日小民被害不可勝言顯是各官互相推調不即剪

除非惟老師匱財而事無成功抑且長奸縱惡而賊愈得計况兵貴拙速未覩巧遲今各官躬提大軍動以萬計曠日綿歲而前項苗賊出沒多不過一千之上少或三五百人不能鼓動勦殺愈加縱橫得志官民奔竄地方弗寧而各官方且張皇虛誕日報捷音上欺朝廷下壞邊務事勢如此若不上緊處置誠恐各峒賊徒因見官軍畏縮搶掠人財已是得計互相扇動連結爲非遺地方後日之患決非細故合無就令差來人馳驛齎文

與王來梁瑤及都督陳友等調度官軍躬親統領前去  
賊發地方隨宜設法撫招勦捕務在痛斷根株勿使枝  
葉延蔓仍將撫捕過緣由具奏不許似前推調顧望益  
長賊計及以負爲勝妄報捷音愈張賊勢重貽後患本  
部仍行巡撫右副都御史李實公同鎮守內官梁還等  
及巡按監察御史都布按三司等官查照前項地方如  
果官軍調遣不敷將長沙等四衛除輪班廣西操備之  
數不許占畱督令依期前去彼處聽調殺賊外其餘在

城守備屯田等項官軍舍餘并民壯內宜從李實等量數挑選精壯之人或聽王來等調遣或就令守備武岡州官員管率兼同彼處官軍民壯人等勦殺賊寇各官必須和同計議以圖成功毋得爾我矛盾疑忌致誤軍務如違罪有所歸其缺少食糧本部行移戶部設法徑自措置緣奉欽依兵部知道事理具題景泰三年六月十七日奉聖旨是欽此

兵部爲賊情事內府抄出鎮守湖廣內官梁還等題據



湖廣都司守備武岡署都指揮僉事范真呈景泰三年六月初六日三更時分據打信軍人鄧思晚等走報苗賊一起不計其數從地名木瓜橋等處出沒會同布按二司委官照磨王泰等計議當時調遣指揮陳福高勲侯俊管領原選殺手敢勇頭撥官軍一千六百餘員名差百戶尹良刁榮一汪安喬雄等分投督哨及武岡州委官粟福巽管領民壯協同前去苗賊出沒處所相機截殺續據指揮陳福等回呈依蒙領軍前到地名惟塘

市木瓜橋遇苗無數一起約有二千餘徒各執鎗弩張打旗箭分投於渡頭橋威溪清溪鼓山遍村打劫燒毀房屋隨督官軍奮身向前當用飛鎗火箭藥弩等器敵退各賊隨住高山占剗愈肆猖獗聲言要搶武岡城池等語爲因山嶺險峻路道崎嶇不能追捕又據打信軍人林貴伯等走報後路桑林田白水源等處苗賊窺見官軍調出要來攻劫關廂長街必須掣軍回州護守具呈到職除將官軍分投設伏四面賊衝要路截殺外竊照

武岡州所轄城步蘭牛扶城等四十餘寨苗蠻缺食生  
拘不服糾合大小等峒苗徭不時潛從各路桑林田船  
田鋪等處出來節調官軍前去截殺追退後來不絕先  
據步城巡檢司火牌飛報上下崖頭中坪蓬峒苗人蔣  
插田禾已了糾合各寨苗蠻要往本州攻劫等因整搦  
官軍哨備爲照賊路數多官軍禦調不敷通行去後今  
呈前因叅照前項苗賊在於地名惟塘市渡頭橋清溪  
等處流劫緣係王國地方除晝夜固守又且本州見在

倉糧止有二十四百石係干賊情猖獗逼近城池重務擬合差人馳報等因備呈到臣叅照苗蠻賊寇四散流劫燒毀房屋聲言要打武岡城池等語係干苗賊逼近城池重情具題該本部官欽奉聖旨該部知道欽此欽遵抄出到部除倉糧行移戶部徑行外叅照武岡州地方先該湖廣三司等官節奏見有苗賊或三五百人或千餘人侵擾剽掠殺傷官軍本部已經不次覆奏行令總督總兵等官右都御史王來保定伯梁瑋等調度官

軍設法撫捕去後經今日久功效蔑聞而前項賊寇聚  
有二千餘徒比舊愈加數多其勢愈加猖獗且聲言要  
打武岡城池等語而梁珪等非惟不能設法奮勇勦殺  
抑且竝無一字奏報顯是各官因循怠忽互相推調不  
肯躬親督兵撫捕若不督併勦除即日興師轉餉已及  
三年之上地方不定人心搖惑而武岡州又係有王國  
去處與衡州長沙岳州武昌一帶大江接連慮恐賊勢  
益張沿江上下聞風驚懼重貽後患未便又况寇不可

玩兵不可久玩則賊情愈肆久則供給浩繁財力屈殫  
皆非經理之道治安之策合無差人馳驛齎文與王來  
梁珪督同守備湖廣都督陳友等上體朝廷付託之重  
下念軍民擾攘之艱躬親統率官軍將武岡州等處苗  
賊作急招撫勦捕務在和同計議協力齊心以收萬全  
之功不許顧望遷延玩愒歲月致貽一方之患若今日  
各官苟且文具倘或賊寇勢大卒難整飭失誤事機罪  
將何逭若果官軍調遣不敷宜從將附近武岡州所在

軍衛有司官軍民壯人等隨宜調用務圖成功以保地方以安人心仍將撫捕賊寇盡絕緣由具實回奏緣奉欽依該部知道事理具題景泰三年七月初一日奉聖旨是欽此

兵部爲陳言禦寇救患等事兵科抄出欽差監察御史王允題節該欽奉勅廣西尋梧柳慶等處盜賊連年生發流劫鄉村殺掠民財邊民受害朕甚憫之近言者必得廣東調兵與廣西兵會合夾攻庶幾可滅前賊然廣

東亦累報茂名等縣賊寇出沒不絕兩廣賊勢未審緩急若何遣將調兵難以遙制今特命爾星馳往彼察勘廣東賊勢如果少緩即便會同彼處鎮守巡撫內外官員著令都督董興量領大軍并彼該調輪班官軍前去廣西會合都督僉事武毅等將應有賊寇逐一勦滅以靖地方其董興等不許似前推避縱賊殃民若廣東亦賊勢未寧董興難於調動或先調輪班官軍前去接應務在相度事勢從宜區畫停當而行爾仍須從公道體



訪二處賊情有無虛實及其守禦等官有無蒙蔽及董興武毅等有無貪虐明白具奏區處毋或因循忽略及徇人情不言如違罪有所歸欽此欽遵臣於景泰三年五月初二日已將廣東都布按三司經歷司呈報劫殺人財盜賊起數并都督董興難於調動情由照依勅內事理會同左監丞阮能侍郎揭稽具題外近查得廣西賊情六十二起比之廣東賊情中間多係流劫鄉村殺掠民財重情并體得兩廣守禦守備官員賣放軍士備

禦缺人盜賊得以縱橫害民守禦等官彼此互相蒙蔽及體訪得都督董興隱占廣州左衛旗軍董童狗等七十五名前衛所旗軍羅臻等五十六名右衛總旗王孝保曾斌等一百一十一名後衛小旗黎二仔梁堅等共一百一十二名每名按月辦納月錢二百文俱董興入已賣放歇役景泰三年董興將增城千戶所該調原征輪班精壯百戶唐忠不令廣西征進却改調幼弱百戶郝公明頂替前去中間顯有受財枉法情由及訪得都

督僉事武毅叅將范信自到廣西守備號令不嚴專一剝削軍士且如湖廣每年該調輪班官軍若到廣西武毅范信每衛官軍名下索要拜見銀一錢入已俱係主文寫發軍人胡朴等過送景泰二年巡按御史奉都察院劄付查出桂林中右二衛官軍戶下成丁餘丁王紀等共六千四百七十二名照兵部奏准事例相兼官軍操守城池今訪得此等餘丁竝無操守及體得馴象衛鎮撫馬驥係軍前聽調人數今却買閑在家又不隨操

等因致被本衛經歷司知事方岳舉呈事發中間顯有武毅范信受財賣放情由比之已故總兵官山雲守備之時勇智廉介號令嚴明徭賊聞之心寒膽戰有不佞矣臣看得人心之順逆徭賊之叛服實關乎總兵官得人與不得人爾今照都督董興都督僉事武毅叅將范信素乏武略叨掌兵戎號令不嚴操練無方又且指跟隨而賣軍空閑假拜見而索銀入已改調不公則董興玩法之罪難逃受財賣放則武毅范信欺君之惡難掩

貪濫之狀大著于兩廣科擾之弊流及於三軍逮至有  
警董興則巍然高坐城中不卽率軍勦殺武毅范信則  
徒然領軍在外焉敢與賊對敵致使被害良民死者怨  
氣冲天生者哭聲動地罪惡至斯人皆痛恨其中武毅  
已年六十之上筋力日衰威名日退以此土官之不信  
從搖賊之肆劫殺況廣西地方軍少賊多不可不慎再  
照兩廣都指揮指揮千百戶等官徐昇張顯等俱係守  
備守禦官員不以地方爲重惟以財色爲務縱賊殃民

彼此蒙蔽原其罪犯俱屬失機若不懲治於既往誠恐貽患於方來合將徐昇張顯等查提問罪董興武毅范信差人提取赴京送問仍乞勅另選素有智謀廉介如山雲武臣三員前來更替以爲地方保障便益內董興武毅范信俱係武職大臣徐昇張顯等俱係守邊軍職具本該通政使司官奏奉聖旨該衙門知道欽此欽遵抄出到部查得先該兵科右給事中黃士雋題稱都督董興占愾官軍一千五百員名以致賊勢猖獗及稱武

毅往往以廣東官軍不至爲詞推調不行殺賊且聞本  
官操守甚是不潔又聞人言董興若仍在廣東二年必  
再有黃蕭養者出等因具題本部議得合行都察院選  
差有風力御史一員請勅前去體勘各官有無貪虐情  
由應否存畱取回免致貽患明白具奏定奪等因節該  
奉聖旨是欽此除欽遵外近又該武毅李棠同巡按監  
察御史廣西都布按三司具奏鎮安府土官岑永壽伊  
男岑祖德糾合目兵及邀請交趾蒙當保樂貳州里凶

獬豸約有一萬餘徒攻破城池殺害兄母趕逐親父虜去男婦二千之上及稱桂林柳州平樂梧州潯州等府永福荔浦來賓等州縣節報賊寇共七十二起攻打城池燒毀村堡殺虜男婦剽掠財物滋蔓不息等因具題抄出本部又經議擬前項賊情既已如此危急而武毅等却乃視爲泛常怠忽自如略不經心整飭若不另爲處置慮恐失陷地方未便合無請勅差錦衣衛能幹頭目一員同有風力御史一員再行馳驛前去廣西體察



賊情何似及武毅李棠有無總兵提督之才一應事務  
曾無盡心區畫堪否任用具實回奏等因奏奉聖旨是  
欽此除欽遵外今抄前因叅照前事既已御史王允將  
董興武毅平日賣放軍士辦納銀兩并怯懦無爲縱寇  
長奸失機誤事流毒生靈貽患地方各項情實體出回  
奏明白所據錦衣衛官并續後御史不必再差臣等切  
詳董興武毅等各掌三軍之重權却爲兩方之巨蠹以  
賣軍得財爲能事視縱寇殃民爲等閑貪污不才猥懦

無恥董興則擁兵自衛而不敢出城武毅范信則率領  
官軍而不敢應敵迹其所爲蓋天地鬼神之所不容而  
婦人女子之不若是致數年以來地方攪擾賊勢猖獗  
聲息殆無虛日生靈略無寧歲軍疲於戰守民困於轉  
輸戰骨隨處而有哭聲無處無之上而辜負國恩下則  
感傷和氣皆董興等爲之其爲痛恨庸可勝言今近侍  
之官發之於前而風憲之職實之於後事跡彰露情犯  
明白若不量加黜罰另選賢能則兩廣地方兵連禍結

曷有紀極譬則人之有疾而付之庸醫非惟不能治療而反以增劇若非更張必致危殆此係地方人民重務難從姑息臣等再三籌畫必須將董興武毅等量爲究治庶可維新政令以冀收效方來看得鎮守涿州良鄉署都督僉事陳旺操守廉介軍旅整嚴所在軍民無不信服及鎮守鴈門關署都指揮使翁信廉幹謀勇歷練老成俱堪大受合無將陳旺翁信各陞實授都督僉事俱充副總兵官陳旺令去廣西翁信令去廣東代替鎮

守地方武毅董興差人行取來京請勅前去到彼之日  
務要痛除宿弊一新號令益厲廉清之操務得軍民之  
心勤於教閱公於行事振揚軍威作興士氣撫恤土官  
土人俾其畏威感德仍將各起賊寇躬親督兵相機撫  
捕若果官軍調遣不敷廣西則拘集各該土官宣明朝  
廷恩威量加獎勞起調狼軍相兼官軍領用仍許以有  
功之日重加陞賞其間土官若有克効勤勞合當頒降  
璽書旌異并加與陞賞宜從馳奏定奪廣東亦將土兵

并各衛所舍人餘丁盡數選揀協助官軍守戰各官必  
須懲戒前失恪守初心使下人有所表率賊寇有所畏  
懼以爲藩方保障以除軍民患害果有利國便民之事  
宜從商確而行事體重者明白具奏不許纖毫怠忽致  
誤軍機重務若事干兩處地方必須會兵勦殺及計議  
施行者亦要協心比志和同而行不許各持己見互相  
矛盾成功則俱受陞賞壞事則厥罪惟均仍將在京五  
軍營隨操署都督僉事陳友代替翁信鎮守鴈門關把

總都指揮僉事王淳代替陳旺鎮守涿州良鄉亦各另請勅付各官前去臣等又議得各邊叅將等官先因貪淫酷暴該本部等衙門劾奏行取赴京中間多有仍復原舊爵秩得以安享優閑甚至營求管事管操者頗乖事體殊失勸懲今照董興武毅畏怯貪婪之跡已著總兵統馭之任難勝雖不行提赴京明正國法亦當量加降黜以申公義合無將董興武毅范信俱降爲事官就於本處跟隨總兵官殺賊果有大功另行定奪務在安

分効力悉聽總兵等官節制不許偃蹇傲慢有違軍法  
如違聽陳旺等輕則量情決罰重則奏聞區處如臨敵  
不用命照依軍法處置其都指揮指揮千百戶等官徐  
昇張顯等并主文說事過錢軍人胡朴行移巡按御史  
查提究問明白監候具奏發落以昭朝廷法令之公以  
慰地方人民之望則兩方賊寇可以冀其消弭而百萬  
之軍民可以泄其怨氣而保其性命及照先因廣西賊  
情緊急本部累曾具奏行令廣東總兵等官董興等調

兵前來會合撫捕而董興公然不肯啓發展轉捏詞具奏詳其所由蓋是兩處總兵官不相統攝彼此頡頏難於行事況兵家之事貴有節制而軍中號令貴在專一借使人各異見豈能并力成功今兩廣道路相接賊寇更爲出沒又兼土官衙門數多若無平日有名望大臣一員總督其事節制兩方未免各相推調不肯應援卒難成功看得太子太傅安遠侯柳溥先充廣西總兵官名望素著蠻夷懷服近日廣西三司亦曾奏保合無令



本官仍充總兵官掛征蠻將軍印節制兩廣軍馬勦殺賊寇凡一應事體悉聽便宜處置不惟土官信服而狼兵易於起調亦且苗蠻聞風而賊勢自能消沮如安遠侯不可輕動合無令臣謙或太子太保兼戶部尚書金濂太子太保兼都察院左都御史王翱內請旨點差一員充總督軍務請給勅旨并總督關防前去兩廣調度官軍撫捕賊寇一應軍務陞賞悉從便宜而行所在總兵等官竝聽節制將廣西征蠻將軍印暫令陳旺署掌

候寇賊大勢已息地方日漸安妥差去總兵或總督官  
回京只令陳旺翁信在彼鎮守再照都督董興武毅等  
穢跡彰聞而侍郎揭稽李棠與之共事公然蒙蔽不以  
上聞中間顯有通同故縱情由亦合究問緣兩處地方  
緊關用人合無請勅提督廣西軍務右侍郎李棠巡撫  
廣東左侍郎揭稽務在洗心滌慮持廉秉公上爲朝廷  
分憂下爲軍民造福凡有一應軍務等項事件必須會  
同總兵等官從公計議而行苟或事有空礙無益軍民

者亦須執法舉正務歸至當自總兵官以及管軍頭目  
若有貪財害軍不守兵政者就便指實舉奏不許貓鼠  
同眠同惡相濟以玷名節以乖事體以負國恩如違罪  
有攸歸前項所議事件俱係軍國重務俯聽聖裁緣奉  
欽依該衙門知道事理具題景泰三年七月初四日奉  
聖旨是陳旺翁信且都著署都督僉事俱充副總兵令  
兩廣代替武毅董興鎮守地方待有功時一發陞賞陳  
友王淳准擬董興武毅俱降做爲事官就於本處聽總

兵官調度殺賊有功時定奪柳溥在京領軍操守不許動著王翱充總督軍務前去兩廣調度官軍撫捕賊寇李棠揭稽寫勅去切責他著洗心改過同總兵等官協和行事再仍前怠惰誤事不饒欽此

兵部爲苗賊出劫殺死人命事兵科抄出巡按湖廣監察御史張翰題景泰三年六月十五日據湖廣布按二司委官照磨等官王泰等呈本年六月初八日據寶慶府武岡州申本月十七日據儒林鄉民人潘必政等連

名狀告本月初六日巳時分忽被城步蘭牛水等峒苗賊約有五百餘徒張打旗號前來本州城名木瓜橋駐劄四散於惟塘市渡頭橋等處流劫離城五里之路殺死各家男婦潘接保等九名口虜去男婦一十八名口耕牛八十一隻放火燒毀房屋家業畜產盡行劫虜人口奔走投城顧命即今苗賊仍在本鄉住劫不退等因具呈到院臣查得先該湖廣都布按三司經歷司呈俱奉本司劄帖爲苗賊出劫等事據靖州綏寧縣申據赤水

等圖寨老人易通等節次呈告本年二月初二日有苗賊於金田等處打劫張文質等家人財本月十一日有苗一百七十餘徒打劫本里楊通曉十二日又有七百餘徒劫掠本里民人唐時略等十四日二百餘徒劫虜楊正榮等十五日三百餘徒經過石井十八日起各三百餘徒往長湖二十五日一起往新寧縣俱流劫殺虜人口財畜本年三月初三日有一百餘徒打劫石門初八日七十餘徒劫破大水峒民李再林等家十三日

六百餘徒攻打田心寨十四日有一千七百餘徒劫殺石牛圖民人劉進華等家人四十一口十六日據水峒民龍玄壇等告有苗頭吳英帶領一百二十餘徒入圖殺傷男婦八口十八日一起有三百餘徒長湖捉虜民人曾仕寧等一起二百餘徒在赤塘捉虜民人曾和等又往長湖二十一日八十餘徒又在長湖二十五日四百餘徒攻夏抑圖接日攻打新寨至二十八日往大水峒去訖二十六日五百餘徒劫溪塘二十七日七百餘徒劫長湖二十九日

二百餘徒出石門當日三百餘徒於木瓜橋劫虜人民四月初三日五人殺傷趙惟志男婦六人十二日二百餘徒金田屯殺死軍餘朱祖保二十九日二百餘徒金田出劫王成等家五月初三日一百二十餘徒長湖金田等處十五日五百餘徒攻破峰寨殺死楊正茂李慶等家男婦一百二十四名口虜去二十三名口十七日五百餘徒前來蔡家塘威溪出劫等因叅照守備武岡州署都指揮僉事范真等明知苗賊自二月以來四散流劫軍民殆無虛



日大肆猖獗離城五里路程殺虜人財尚且坐視不救  
俱屬誤事合當拏問以警將來緣范真等係方面軍職  
具題本部官欽奉聖旨兵部知道欽此欽遵抄出到部  
除前項賊情近該鎮守湖廣內官梁還題本部已經奏  
准通行總督總兵等官右都御史王來等督兵勦捕去  
後別無定奪所據奏稱守備武岡州署都指揮范真等  
明見苗賊自二月以來四散流劫軍民離城五里殺虜  
人財坐視不救要行拏問一節緣范真係守備武岡州

官員即目彼處賊寇正在猖獗之際緊用將官管領軍馬守戰地方合無將范真行移巡按監察御史照名提取究問另選知勇都指揮一員代替守備惟復且不提問令巡按御史將范真等取具死罪招伏令其照舊在彼設法運謀將前項苗賊務必設謀勦殺以贖前罪緣范真等係方面軍職及奉欽依兵部知道事理未敢擅便具題景泰三年七月初四日奉聖旨不問著巡按御史取了死罪招仍捕前賊再不用心不饒欽此

兵部爲軍務事照得廣西各該土官衙門比先年間總兵官行事公道各官竝聽節制遇有起調土兵撫捕賊寇隨即用命起發所向成功以此地方寧靜軍民安妥近年以來爲因副總兵都督武毅等怯懦無謀處置乖方以致各該土官不肯信服甚者中間心持兩端強梁跋扈重爲地方之患即目武毅等已是降黜欽命太子太保左都御史王翱前去總督軍務勦殺賊寇正在用人之際而土官所部土兵委係驍勇慣戰賊人素所畏

懼若不維新號令盡革宿弊誠恐不得其心未免難於調用況以夷攻夷爲策之上而恩威並行制事之宜合無請勅王翱候到彼之日拘集各該土官宣明朝廷遞年優待之意并各人享有爵位之隆茲當地方不寧正宜効力補報如土官都指揮黃珖先因爲事提問後都察院具奏要行疎放宜從王翱斟酌所犯事情可以疎放還職就便疎放又如土官知府岑瑛具奏要行赴京陳情必是事有不平以此欲來控訴自今宜竭盡臣節

捍禦地方仍調所部土人協助官軍勦殺賊寇若有成  
功朝廷陞賞不吝其餘各府土官但有克效勞勤與黃  
玠岑瑛等果能據忠効力合當賞勞輕則聽王翱便宜  
處置事體十分重大者明白奏請定奪及黃玠岑瑛俱  
係蠻夷大頭目久在邊方積威有素假其兵力雖可成  
功原其本心未易測度凡百調度處置及事委曲宜從  
王翱密切處置停當具由開奏取自上裁務在措置公  
平而事體允當夷情悅服而緩急有濟緣係獎勵土官

事理具題景泰三年七月初九日奉聖旨是欽此

兵部爲軍務事准太子太保兼都察院左都御史王翱  
咨近准來咨照得廣西各該土官衙門比先年間總兵  
官行事公道並聽節制起調土兵隨即用命所向成功  
近年以來總兵叅將怯懦無謀處置乖方以致各該土  
官不肯信服甚者中間心持兩端強梁跋扈重爲地方  
之患即目欽差王翱前去總督軍務正在用人之際其  
土官所部狼兵委係驍勇慣戰賊人畏服若不維新號

令誠恐不得其心未免難於調用合無請勅王翱到彼之日拘集各該土官宣明朝廷優待之意享有爵位之隆正宜効力補報協助官軍勦殺賊寇若有成功重陞重賞必不吝惜等因除具奏外移咨准此叅照廣西夷賊生發誠是總兵政者禦寇賊不得其法待土官又非其道以致地方不寧人多受害再照夷賊所畏懼者必在乎土兵而土兵聽調効力者又在乎土官而土官得人用命又先結之以恩然後宣朝廷威德明賞罰之公

庶可使革心向化地方獲安今請勅當職前去省諭不  
若徑請勅各土官黃珌岑瑛等體天道順朝廷盡忠協  
力捕賊悉聽王勦節制事平之日重加陞賞仍先請給  
官庫或戶部折糧銀一千兩表裏四五副齎去會同總  
兵侍郎等官先將得用土官黃珌岑瑛等每人給賞一  
二表裏銀一二十兩以固其心庶幾恩威並行事易成  
功其餘土官應該賞者斟酌給與剩餘者就彼收庫糴  
糧等項公用便益等因移咨到部看得來文內開稱要



請勅諭并銀兩表裏賞賜勉勞土官黃珌岑瑛一節緣  
廣西地方土官衙門數多其黃珌係廣西都司土官都  
指揮使領軍守備潯州等處土官岑瑛係思恩府知府  
比之各處土官其部落頗盛氣勢頗強彼處蠻夷素所  
畏服兼正統十四年廣西賊寇生發以來而各官往往  
率領土兵協助官軍勦賊其中心雖未可測而兵力則  
有可憑及兵家亦有以夷攻夷使詐使僞之說兼且蠻  
夷之性惟利是圖若欲結其歡心必用賞賜誘掖古人

有言成大事者不計小費又曰重賞之下必有勇夫是也今王翱又係欽命充彼處總督軍務官員既已籌畫停當建明前策合無准擬請給勅諭二道內一道與黃珖一道與岑瑛并行戶部禮部依數開與銀兩表裏就付王翱帶去招集黃珖岑瑛到官或差人齎捧與勅諭量授銀兩表裏宣以朝廷恩威諭以逆順禍福俾之悉心効力恪遵朝命益堅臣節無事則謹守地方保無疎虞遇警則調度人馬聽受節制凡有賊寇生發就便率

領土兵協同官軍勦殺果能建立大功肅清邊境俾蠻夷懾服軍民獲安朝廷公論如天日之明自有重大陞賞必不惜吝務在竭忠委身以濟邊務不許陰持兩端心懷疑貳緣係請勅賞勞土官事理未敢擅便具題景泰三年七月十一日奉聖旨是欽此

兵部爲邊情事准禮部咨禮科抄出巡撫四川都察院左僉都御史李匡題景泰二年十二月內臣差威州陰陽典術袁釗伴送棟巴罕呼宣慰使司掌司事都指揮

同知科爾壘嘉勒燦差來番僧喇嘛回還就令科爾壘嘉勒  
燦將原占雜谷安撫司并達實愛滿等官司地方印信退  
還各司掌管近據袁釗回說雜谷地方印信棟巴退還  
故安撫司日斯結弟昆吹達爾掌管帶本人前來回話  
到舊維州因時症痘瘡在彼住歇達實愛滿地方棟巴亦  
退還本司頭目牙冊掌管印信係番僧喇嘛新濟齋往  
魚通寧遠宣慰使司遊方未回但先前雜谷達實愛滿各  
管地方不受棟巴約束即今雜谷達實愛滿雖得地方俱

聽棟巴節制保縣舊維州地方棟巴不肯退還等語及將棟巴書一紙內一紙送臣銀酒罐一箇計重拾兩金珀珠一顆又一紙問臣討御製大誥一部爲善陰隲書一部孝順事實一部洪武韻禮部韻廣韻玉篇周易尚書毛詩小學註解士林廣記居家必用方輿勝覽成都記釋文三註古文一部書中詞語甚恭非若每時放肆有見感戴聖恩洗心向化之意所送銀罐金珀珠若便却回夷人以爲羞耻反生猜疑臣受收隨此封進及將

來書二紙咨繳禮部知會外照得求討書籍一節考之唐玄宗之世吐蕃遣使求毛詩春秋禮記正學于體烈以爲與之書使知權畧愈生變詐非中國之利尚書裴光庭以爲吐蕃久叛新服因其有請賜以詩書庶使漸陶聲教化流內外體烈徒知書有權畧變詐不知忠信禮義皆從書出於是玄宗賜以詩書今照棟巴求討前項書籍臣以爲成都記即成都府誌書也一府之形圖關隘於此乎載不可以此誌與之使其知成都之地方

也方輿勝覽天下之形像關隘於此乎載不可以此書  
與之使其知天下之地方也其餘書籍可以與之誦讀  
使其知忠君親上之道佩仁服義之節若或不與彼來  
朝之人市於書肆之中亦不甚難不若因其請而與之  
可以固結其心書籍係棟巴所無有朝廷所未賜臣不  
敢以私與如蒙乞勅禮部計議將棟巴所求書籍遣人  
量加頒賜因而勅令將舊維州地方退還保縣彼必感  
恩知報可免西顧之憂臣之愚見如此具題該禮部官

欽奉聖旨該衙門知道欽此欽遵抄出到部除奏討書  
籍另行奏請給與外所據令將舊維州地方退還保縣  
一節移咨到部叅照棟巴罕呼科爾壘嘉勒燦其誦詐之  
心桀驁之狀陰懷異圖非止一日今雖要令將舊維州  
退還本縣誠恐本人反復多端貪戀土地人民不肯退  
出并雜谷安撫司達實愛滿長官司雖稱退還亦不見著  
實其稱印信帶出遊方等語俱屬虛詐又稱雜谷達實愛  
滿雖得地方俱聽棟巴節制則是雖有退還之名其實



占管如故李匡所謂洗心向化未必不爲虛言今既禮  
部將前項書籍給與所據舊維州地方合無行移羅綺  
再行公同鎮守都指揮周貴等從長計議其於夷情邊  
務如果棟巴罕呼草心向化變惡爲善實有遵奉朝廷  
之心別無變詐不實就便差人齎文與科爾壘嘉勒燦以  
謂爾今奏討書籍朝廷已允其請但舊維州係附近保  
縣去處爾既有恭慎之心不失臣節宜將本州地方退  
回本縣以表臣順以見忠誠毋得猶豫狐疑自持兩端

仍令羅綺當知科爾壘嘉勒燦之奸當念地方付託之重  
必審勢度情必輕利重義今後蕃夷饋送物件雖不可  
遽然辭却以生夷人疑貳之心亦不可輕易接受以啓  
夷人輕侮之意務在處置停當俾上下相安緩急有濟  
以折蕃夷之奸謀以爲地方之保障倘有疎虞責有所  
歸緣奉欽依該衙門知道事理具題景泰三年七月十  
五日奉聖旨是欽此

兵部爲賊情事兵科抄出廣東布政司高州府知府楊

仰譽等奏照得景泰二年十二月日期不等節據化州  
并梁沙巡檢司及茂名吳州二縣申該民里老李永中  
等告報節被廣西強賊越境前來打劫州縣陵羅銘信  
等鄉地名馮塘登教等村民人龍得洪昭張仲九等家  
財物燒毀房屋未倉殺虜人口等因到府不次即刻通  
行備達轉報本府地名廣東都司都指揮僉事孫旺指  
揮同知黑爽李福操守指揮僉事劉靖等官及附近神  
電高州信宜寧川等衛所各速調督官軍及本府帖委

照磨所檢校蘇芳部領在官民丁土獍李雄等四百二十名協同官軍截捕近今景泰三年正月十三日據檢校蘇芳呈稱與賊交鋒對敵殺獲賊級九顆餘賊散入大山去訖呈送功級通行發於賊路梟掛續據化州拜茂名等縣申各准原委判官范昭等牒關據里老莫宗貴等勘得民人龍得等家委於景泰二年十一月日期不等節被廣西北流陸川等縣羅卞等里民賊李受本男李秉等波河等徭賊首韋尚明等糾引潯州等府大

藤峽炭山等處強賊或一二三百不等各從北流等縣地名竹聽窪白米文黎扶來等山村越過梁家沙白梅竹山等營堡地方入境分宗流劫州縣鄉村累報各該守哨官軍不能設策截敵強徒得勢兇暴猖獗殺人放火捉虜男婦有銀者贖脫無銀者虜回去訖見今駐屯原居山洞不散人民驚疑遠避久無復業等因備將勘過緣由殺虜人財等件花名戶口數目繳結各申到府除節次備由申呈巡按廣東監察御史布按二司等處

及仰州縣委官存恤被賊逃散人民復業安居者量免糧差外臣等切思廣西陸路接通本府地方俱有軍堡巡司截把又有哨捕官軍縱容強徒連年越過通合北流等縣交通民謠顯是前賊在於該管衙門符同捏稱生理別故告給文引照過搆集爲盜及本府原設梁家沙白梅竹山等堡俱奉議調神電拜高州等衛所三百二百不等各有指揮千百戶等官郭禎等督備守把廣西賊行要路今却往往躲避任賊越入境內照得被劫

衛所各處又有都司委官指揮黑爽馬貴劉靖李福等  
官在彼守備當於本府月報支糧卷內查得各官統領  
哨捕軍通計五千二十六員名俱屬都指揮僉事孫旺  
總督各官職專其事明知累報強賊不肯親自領兵敵  
捕止使承調官軍千百戶周欽等遇賊無謀罷陣退走  
殺害軍民強賊得肆民遭荼毒存者驚散難以安生若  
不設法勦除固守恐後構集遂成大患貽累邊方城池  
殘害生靈實難保備如蒙准奏乞勅廣東廣西總兵官

巡撫鎮守巡按三司等官計議合無赴今強賊未散惟復秋晴多調精銳官軍赴期前來兩廣交界地方設法併進合先將北流等縣羅卞等里竹窪等村民賊李受男李秉等波河等徭賊首韋尚明等抵巢盡數勦滅絕其根蘖兩廣交界原設營堡照舊存留仍乞添撥官軍守把各議委有謀公廉都指揮一員時加往來總督操守城堡今將州縣勘過殺虜人財等件緣由具本專差典史曾祿親齎具奏又該高州府茂名縣縣丞廖清亦



奏前項賊情內稱都指揮孫旺等統軍鎮守却在城  
坐視覓娶妻妾楊氏等及通房使女無數在家飲酒但  
遇報賊公然閉門不理探知賊退止調千戶等官部領  
軍旗出外東躲西藏不肯進軍勦殺致使強徒得志四  
散流劫鄉村小民受害等因又該高州府化州知州鄧  
敏等亦奏前項賊情該通政使司官俱奏奉聖旨兵部  
知道欽此欽遵通抄到部查得先該鎮守廣東左監丞  
阮能及巡撫侍郎等官揭稽等俱題前項賊寇劫虜軍

民擾害地方等情拜都指揮等官孫旺等遇警閉門高坐臨敵束手傍觀耽酒戀色玩寇殃民等因本部議擬合無行移巡按廣東監察御史將都指揮千百戶等官孫旺等照名查提問擬明白監候奏請發落等因節該奏奉聖旨都指揮千百戶等官著巡按御史取了死罪招令用心務要撫捕前賊以贖前愆欽此欽遵外今抄前因叅照都指揮等官孫旺等係管領軍馬守備地方官員明見前賊流劫鄉村殺掠人畜不思躬親督兵設

法撫捕却乃擁兵自衛端坐一城耽戀酒色般樂怠傲  
視賊情如兒戲輕人命如草芥壞法貪淫無所不至失  
機誤事累惡不悛天地鬼神所不容官吏軍民所共怒  
本所以除患而反爲患本所以安民而反害民雖聖恩  
俯賜於寬容奈軍法難從於姑息况孫旺僥倖獲免却  
乃大肆貪淫穢迹惡聲聞於遠邇若不依法究治懲一  
戒百即目廣東等處地方寇賊猖獗人民被害日甚一  
日推其所由蓋因統軍官員貪淫怯懦各騁已私縱奸

玩寇之所致也又況見今欽命總督總兵等官太子太保兼左都御史王翱等前去兩廣撫捕賊寇正宜申明軍令作新士氣以冀收功於方來以除軍民之患害今董興已蒙降黜而孫旺未正典刑合無行移王翱等到彼調度官軍將各起賊盜上緊設法招撫勦捕務俾日下盡絕寧妥以副朝廷委任仍將都指揮孫旺拘提到官究問失機誤事貪淫害軍情犯明白或依律照例決斷或便宜發遣充軍立功以爲將臣不律者之戒仍將

孫旺占娶軍民子女并受要贓物給還原主以雪下人之怨以表國法之公若犯該重罪監候奏請定奪其餘干問官員宜從王翱照例施行如此庶使號令行而兇頑不致肆非兵政舉而賊寇易於殄滅緣係懲治失機誤事官員及奉欽依兵部知道事理具題景泰三年七月十五日奉聖旨是欽此

兵部爲陳言撫安夷民事兵科抄出總兵官征蠻將軍都督同知沐璘等題照得先該總兵官黔國公沐斌准

右軍都督府勘合准兵部咨呈兵科抄出禮部等衙門  
主客清吏司郎中姬堅等題竊見雲南所屬木邦緬甸  
孟養等處地方被麓川賊首思任發劫掠人民太上皇  
帝憫念生民遭此荼毒發軍征勦本賊伏誅其賊子思  
機發尚未殄滅潛居孟養不時出沒搶殺人口師旅經  
年備邊差撥軍民接運糧草給餉差役繁重斯民不勝  
勞苦今木邦見差頭目前來奏討麓川地方誠恐又行  
激變擾害軍民深爲未便如蒙乞勅該部計議差官帶

領原差來夷人頭目同齋捧詔勅前去麓川宣奉朝廷寬恤之意復其舊土仍賜冠帶金牌信符令遵洪武永樂年間事例歲辦差發象馬依前進貢庶得邊境寧靖等因抄出到部查得先該鎮守雲南太監蕭保題據木邦宣慰使臣罕蓋法緬書告稱要討麓川地方會同總兵等官議得麓川地方已開設隴川宣撫司止有孟止一處未曾定撥欲將孟止地方撥與木邦管屬等因本部議擬未審孟止地方相去木邦地里遠近及撥與管

屬有無利便仍行雲南總兵等官體勘回奏定奪正統  
十一年六月二十六日本部官具奏節該奉太上皇帝  
聖旨既蕭保會沐斌每計議奏來了不必再勘候進去  
雲南時通行寫勅與他著同沐斌蕭保及三司官每公  
同商榷孟止地方與隴川無干可與木邦管屬准他每  
奏欽此欽遵外續於兵科抄譯出木邦陶孟弄孟等番  
字宣慰罕蓋法著我奴婢每送反人首級來天皇帝前  
叩頭乞討地方分付我奴婢每說我木邦罕蓋法著去



管麓川今年若都與麓川地方可與麓川河邊者蘭幾處貼著我每木邦地方等因本部又照前項地方與麓川委無方礙再行雲南總兵鎮守等官通行勘議應否撥與明白回奏定奪正統十一年九月二十五日本部官奏節該奉太上皇帝聖旨者蘭等地方著總兵鎮守官勘議奏來不許輕忽致有忿爭欽此又經通行欽遵勘議去後又該木邦軍民宣慰使罕蓋法等番字奏天皇帝可憐見我木邦著管者蘭景線地方那反人不住

時木邦欲要計較等因抄出本部又經議擬合無再行雲南鎮守等官照依先奉欽依并今奏要管地方緣由從長計議應否撥與宣慰使罕蓋法管治其餘邊情事有無相應違礙務要區畫停當處置得宜俾其事安夷安不致紛爭攪擾明白具實回奏定奪景泰元年四月十六日本部官奏奉聖旨是欽此欽遵通行去後今抄前因叅照奏稱木邦見差頭目前來奏討麓川地方誠恐有所激變要行差人齎詔前去撫綏一節緣係夷情

况蠻賊叛服不常奸詐難測事當臨機處置不可預爲  
定擬及無雲南總兵等官回奏前項地方緣由本部難  
以遙度定奪合無行移雲南鎮守等官并雲南都布按  
三司堂上官及巡按監察御史照依在先節奉欽依內  
事理公同勘議前項地方應否撥與木邦管治并今所  
奏應否差人齎捧詔勅前去麓川撫綏其餘邊情事體  
有無便利務在勘議停當處置合宜通行具奏定奪本  
部官奏奉聖旨是欽此欽遵移咨准此查得先准右軍

都督府勘合准兵部咨呈兵科抄出木邦軍民宣慰使司宣慰使罕蓋法奏討者蘭景線地方等因臣等已經遵守會議委官分撥停當會本回奏訖今該前因會同鎮守雲南奉御黎義叅贊軍務大理寺左少卿鄭顥左叅將署都督僉事胡志巡按雲南監察御史柳春雲南都布按三司左布政使賈銓按察使李璽指揮同知劉玉勘議得麓川地方原係賊首思任發管治後因思任發叛逆侵犯邊境被官軍勦捕奔竄緬甸斬首解京朝

廷已將本賊原有境土開設隴川宣撫司衙門除授土  
官宣慰等官刀歪孟等撫管已定難再更變其賊子思  
機法冥頑無知逃據孟養不服招諭見被緬甸宣慰卜  
刺浪調兵勦獲拘留在彼候其解送赴京當正典刑以  
彰天討今差人齎捧詔勅前去麓川撫綏復其舊土賜  
以冠帶金牌信符令遵洪武永樂年間舊例歲辦差發  
金銀象馬進貢使其歸化緣蠻夷之性譎詐無恒易惑  
難化總使加意撫綏終是內懷疑懼面從心異不肯信

服又恐差去之人或爲賊所餌事既無成反貽輕侮邊  
夷騷動政體有妨尤爲未便會本具題該通政使司官  
奏奉聖旨該衙門知道欽此欽遵抄出到部案查先爲  
前事已經通行勘議去後今抄前因叅照議得麓川地  
方原係賊首思任發管治後思任發叛逆被官軍追勦  
已將本賊境土開設隴川宣慰司撫管已定難再更變  
其賊子思機發見被緬甸拘留今若差人齎捧詔勅前  
去麓川撫綏復其舊土終是面從心異反貽輕侮未便

一節係干夷情邊務既已總兵官沐璘公同各官計議  
停當郎中姬堅所奏委有窒礙難行合行照舊令該府  
行移沐璘將隴川宣慰司照舊開設其冠帶金牌信符  
撫綏一事不必施行仍照原今事理整肅兵威鞏固邊  
境緬甸送到賊子思機發必須外示撫納密切防閑一  
則使之畏威感恩二則使其知我有備務在處置得宜  
使事體寧貼不許紛擾怠忽致有疎虞緣奉欽依該衙  
門知道事理景泰三年七月二十六日奉聖旨是欽此

兵部爲海賊等事內府抄出鎮守廣東印綬監左監丞  
阮能題據委官指揮使歐信呈蒙左副總兵右都督董  
興等會委統領廣州左等四衛官軍四百員名前去廣  
海衛會同總督備禦都指揮僉事杜信提督邊務右叅  
政謝祐巡察邊務副使項忠都司委官指揮僉事張通  
嚴督廣海南海東莞香山新會五衛所官軍人等勦捕  
海賊得獲以靖邊方等因依蒙景泰三年五月二十四  
日起程二十七日到廣海衛有項忠杜信張通在彼先



已差人分投歸德靖康等鹽場借取槽船未到官軍住  
劄至六月初三日方得海晏場駕到槽船三十隻分派  
官軍不分晝夜修理節據廣海衛備倭指揮僉事王俊  
差小旗施方深等報稱海賊雙桅白船一隻單桅船二  
隻在於清水灣灣泊會同杜信項忠張通統領指揮孫  
擎等官軍船隻於初六日晚開船星夜前去至初七日  
早到清水灣不見所報賊船問據王俊說稱賊船初五  
日夜開往漳州海洋去訖初八日謝祐統領南海東莞

衛所官軍船隻到來會同各官分投於海灣密緝哨捕  
不見前船顯是王俊脫放妄報包圍遮掩情罪緣連日  
暴風淋雨船隻顛跌損壞十三日統領官軍船隻回還  
廣海修理本日酉時又據東莞千戶所出海百戶徐勇  
差旗軍馬泰旺等報有海賊雙桅白船二隻在於香山  
海面十字門外洋隨潮上下行使據報隨即會同各官  
統領前項軍船十五日到香山緝訪前船又往鷄公頭  
海面行使有謝祐項忠會議杜信與本職嚴督官軍十

七日到彼不見隨即差人密緝哨聽前船在外洋深灣  
十九日一更時分與杜信張通嚴督領軍指揮孫擎王  
俊韋俊等官軍船隻前去至三更時分見得賊船在彼  
賊人不知其數本職與杜信當督官軍奮勇齊力向前  
與賊對敵各用飛鎗神砲等器敵至二十日辰時傷死  
賊人在船及落水渰死不計其數獲得賊船二隻并犁  
頭鎗三十把長鎗五十條當有杜信被賊鏢傷左脇等  
處仍督軍船黏蹤追敵緣賊船艚身高大所駕槽船扁

小攻敵架低風浪勇急火器燒盡追至未時到於翰鞋  
北尖大海洋風急賊船望東行使去訖緣海洋廣濶船  
隻扁小風浪浩大難以追敵收軍回還石瀾灣住劄有  
杜信被傷身死行委指揮孫擎相驗明白其船對敵被  
傷官軍取勘另報及督官軍緝捕前賊外備呈到臣臣  
等查得先爲飛報海賊登岸事已經會本將潮州等衛  
所失機官員具題兵部官奏節該奉聖旨潮州等衛所  
合問官員著巡按御史提問明白照例發落有干礙謝

祐等奏來處置欽此除欽遵外又爲海賊登岸事會問  
得蔡佛保係福建漳州府龍溪縣八都人招稱有本都  
賊嚴二總即嚴凱晟積年下番劫掠海道事發送本府  
司獄司監候脫逃糾集原下番賊首鄭禮謨與佛保等  
一百八十餘徒搶得福州地面大海船二隻小船四隻  
節次劫殺官軍人等及到廣東海豐鄉村打劫蒙官軍  
緝捕各賊奔走上船將佛保捉獲等因除將蔡佛保問  
擬斬罪監候招出嚴凱晟鄭禮謨并賊徒一百八十餘

名節行都指揮杜信叅政謝祐副使項忠嚴督官軍人等擒捕及具題外今該前因會同左副總兵右都督董興巡撫兵部左侍郎揭稽巡按監察御史周文郁布按二司左布政使戴弁等計議得都指揮僉事杜信既已陣亡合委都司管事都指揮僉事干羽前去會同叅政謝祐副使項忠并續委指揮使歐信嚴督各該官軍人等務在目下跟捕反賊嚴凱晟鄭禮謨等及挨拏通番人船通行解報另行其都司印信暫委管屯都指揮僉

事張玉署管外叅照指揮僉事王俊統領官軍職專備倭却乃與賊交通縱賊開洋卒難追捕失機誤事合另具本叅奏及照指揮張通孫擎韋俊并指揮使歐信不能相機齊力策應致被傷死杜信事屬違法緣即今山海賊情緊急用人之際合無候事寧之日拏問緣係軍職未敢擅便具題又該既能題據委官指揮使歐信呈被海賊將都指揮僉事杜信殺死等因已經具題外案照先爲海洋船隻事據廣海衛呈景泰三年五月初四

日戌時准本衛出海備倭指揮僉事王俊闢本日辰時據望頭等墩烽夫陳道存等走報海賊雙桅白船一隻單桅白船一隻在黃金門望西南行使將近望頭村前海拋泊男子約有二百餘徒各披盔甲器械意欲登岸據報隨督百戶王俊等官軍民壯於望頭村海傍藏伏當職督令官軍衛鎮撫王雄等船奮力向前包圍合關本衛煩將皮甲火器及添撥官軍催捉備倭千戶馮意等官軍前來策應准此除已行策應外備呈又該廣東



都司呈據廣海衛呈本年五月二十五日酉時據許昇  
狀告係錦衣衛鎮撫司帶管百戶中到廣東引鹽募靖  
康等處船隻前去雙恩場關支本月十五日令表弟李  
筠在船開至十六日午時行至廣海衛陳山頭海面忽  
遇賊船一隻各掛望斗擺列鎗刀追趕筠見勢兇復回  
躲至夏春長濬口當有巡海指揮王俊領軍在濬豈料  
不行救護被賊將稍人杜貴船一隻連人捉去清水灣  
賊首大船邊昇去巡捕指揮王俊處告鳴至二十日將

弟許學說船上物件衣籠盡行掀檢賊分付要取錢米  
贖還據告轉呈到臣又據廣東都司呈爲走報海賊登  
岸事行准備倭都指揮僉事杜信等會案咨稱照得本  
職先往香山新會二處及與副使項忠前在廣海選取  
守城并備倭官軍民壯人等共一千五百員名除小樣  
哨船不算外操船二十一隻及右叅政謝祐調到南海  
東莞衛所官軍民壯人等一千八十餘名除小樣哨船  
不算外操船二十五隻會同指揮使歐信等分投各往

外洋大溪山清水澳漳州等處緝捕竝無賊船蹤跡備  
咨轉呈到臣又據廣東都司呈爲賊首違法等事據黃  
清揚演首係廣海衛總旗景泰三年四月二十七日跟  
隨所鎮撫林榮領軍隨同指揮王俊前往夏春長港等  
處巡捕海賊至五月初八日有指揮王俊令總旗王政  
就夜故差千戶馮意帶領清等駕使槽船一十二隻夤  
夜跟船到於望頭村灣泊初九日午時望見白船一隻  
在下川嘴掛蓬行使有千戶馮意就時追捕趕至荔枝

灣海面得獲白船一隻裝載檳榔蘇木等物賊人俱下  
小船望洋奔走其船物件係百戶沈禎著令小旗葉深  
等坐駕至初九日酉時駕回夏春長港灣泊有指揮王  
俊在穩江坐視不行督運追捕前賊將官軍考打趕出  
港口灣泊仍將前船撐進港內就夜同百戶毛俊總旗  
王政軍伴李源監神旺等二十一名駕放料船二隻將  
原獲船內檳榔蘇木等物約有二百餘担竹籠十箇俱  
各封記盡行般裝回家止畱白船一隻檳榔六簍差百

戶沈禎領軍解送前來據首備呈到臣已經節次會案  
令都指揮僉事杜信叅政謝祐副使項忠嚴督官軍人  
等跟捉前賊及將黃清等所首行提事內人犯追問未  
報今該前因會同左副總兵右都督董興巡撫兵部左  
侍郎揭稽巡按監察御史周文郁都布按三司左布政  
使等官戴弁等計議叅照前項賊船在於廣海衛該管  
地方清水灣住經一箇月餘其本衛備倭指揮僉事王  
俊統領千戶馮意百戶毛俊沈禎共一千員名在彼與

賊船對劄不行勦捕任其劫掠若罔聞知先稱奮勇包圍賊船後稱竝無賊船顯是王俊等與賊交通透漏消息縱賊開洋卒難擒捕以致殺死都指揮杜信非惟失機誤事抑且重貽邊患合將指揮等官王俊馮意毛俊沈禎拏問明正典刑以警將來具題該本部官俱欽奉聖旨兵部知道欽此又該巡撫廣東兵部左侍郎揭稽等并巡按廣東監察御史周文郁等俱題前事內周文郁叅出叅政謝祐副使項忠俱合拏問緣廣東俱有山

海賊情緊要用人之際合候事寧通行拏問等因通抄到部叅照指揮僉事等官王俊等統領官軍職專備倭却乃懷奸不忠交通賊寇將獲到船所載檳榔蘇木等物約有三百餘石竹籠十箇盡行般載回家止畱白船一隻檳榔六簍送官及至官軍到彼要行追捕反行透漏消息縱賊開洋卒難追捕以致官軍失利將都指揮杜信被賊殺死與賊寇以相通陷主將於非命異時海寇得志未必不由於斯原其情犯實爲深重誠國法之

所難容神人之所共怒若不明正典刑無以申嚴軍法  
合無行移總督軍務太子太保兼都察院左都御史王  
翱查提王俊并奏內人犯問擬明白將王俊就彼處決  
號令其餘依律議擬監候通行具由回奏及照董興先  
充左副總兵在於廣東領軍殺賊節該廉雷等府山猺  
出沒流劫鄉村殺掠人財焚燒衙門勢甚猖獗本官端  
坐廣東城中不肯領軍勦殺及本部節次具奏廣西賊  
情比之廣東尤爲緊急令董興調度官軍會合廣西總



兵官夾攻勦賊經今日久董興止用虛文展轉延調竝不發兵前去今廣東沿海已有三司委官備倭又無大勢賊寇設使瞭有一二船隻當飛報三司委官相機處置不知因何差委指揮歐信以庸常無謀之人督海洋殺賊之事失誤事機實由於此今董興雖已降充爲事官員原情定罪亦難容恕及叅政謝祐副使項忠雖稱文職終係原委巡海官員既已誤事亦合無令王翱將董興謝祐項忠一體提問明白監候奏請定奪惟復賊

情未寧姑且不提令其上緊殺賊以贖前罪再照杜信緣係廣東總督備倭官員陣亡差委都指揮干羽暫管合無就令干羽代替杜信總督備倭仍行該府轉行本官務在革除前弊維新號令整飭官軍船隻往來操守地方遇有海賊聲息必須相機行事度其可襲則黏蹤盡勦度其不可則持重固守不許貪圖微利循蹈舊轍以致疎虞誤事如有違誤治以重罪緣王俊等係軍職謝祐等係方面及奉欽依兵部知道事理具題該本部

官奉聖旨是都不問著上緊殺賊務要得獲再怠惰誤  
事不饒欽此除董興謝祐項忠已蒙恩宥不問并都指  
揮干羽行移本官代替杜信總督備倭外叅照指揮僉  
事王俊等係阮能等叅出交通外寇陷主將於非命情  
重人犯內王俊乃其首惡合無行移王勦照依本部先  
該擬奏查提王俊等并事內合問人犯通行究問明白  
將王俊就彼處決號令其餘千戶馮意百戶毛俊等依  
律議擬監候具由奏請定奪具題景泰三年八月初八

日奉聖旨是問的明白奏來處置欽此

兵部爲禦寇等事兵科抄出廣東雷州府知府莊敏題  
切照本府地方南連大海西接廣西山嶺險峻路途曠  
野每年冬夏猖賊出沒搶劫鄉民所屬遂溪縣近年以  
來常被搶劫人民驚疑至今不能安生本府城池相離  
咫尺在城雖有雷州一衛四所官軍分撥石城等處守  
堡等項數多在衛操守城池軍餘不過二三百名兼有  
老弱不堪之人本府原編附近民壯二千餘名遇有各

處飛報賊情緊急俱是臣等有司掌印官率領民壯守  
護城池景泰二年十一月日期不等節據遂溪縣申報  
廣西強賊一宗不知其數攻入廉州府石康縣劫掠人  
財又有一宗攻圍吳川縣城池聲揚要來石城遂溪二  
縣搶劫臣已躬親整點民壯守護地方及委各縣掌印  
官嚴督巡司官兵民壯人等隄備外切緣本府城池門  
禁原屬軍衛掌管臣只是率領民壯倘遇賊寇一至不  
免當先對敵守城軍人不聽調度誠恐軍民相推事無

歸一不無臨時失誤事機未便如蒙准題乞照例賜臣  
勅書一道令臣遇有緊急隨宜處置軍民悉聽調度庶  
得事體歸一不致失誤緣係請勅禦寇事理具題該通  
政使司官奏奉聖旨該衙門看計議來說欽此欽遵抄  
出到部看得雷州府地方既係嚴峻濱海之處近來賊  
寇生發流劫鄉村殺掠人畜迄今未息本處雖設有軍  
衛緣因循年久武備廢弛平時不能保障居民遇警不  
能奮勇殺賊以致賊寇肆志日甚一日今知府莊敏具

奏前因雖志存殺賊所言無理緣體統有在難以管攝  
合無不必請勅差人齎文與廣東布政司轉行莊敏令  
其整搦民壯申明號令及一應軍器等件必須堅完鋒  
利仍聽彼處總督總兵等官提調節制遇有緊急賊情  
行移該衛調撥官軍一同民壯設法督領勦殺有功之  
日朝廷陞賞不吝不許假此爲由虛張聲勢因而壞事  
玩寇長奸本部仍行該府轉行廣東都司著落雷州衛  
如遇雷州府移文調度官軍軍務要隨即調撥不許時刻

稽遲仍須彼此和同共濟國事毋得爾我矛盾致誤軍機若有疎虞責有所歸仍通行總督軍務太子太保兼左都御史王翱副總兵翁信一體用心提調若所在軍衛蔑視有司怠忽賊情遇警不行調兵宜從王翱等量情懲治緣奉欽依該衙門看計議來說事理具題景泰三年八月初九日奉聖旨是欽此

兵部爲捷音等事兵科抄出總督軍務都察院右都御史王來題景泰三年七月初九日准總督守備湖廣邊



境左叅將都督同知陳友手本據委官指揮王福湖廣  
署都指揮僉事汪迪等呈該調領漢達官軍前去武岡  
綏寧等處哨捕流劫苗賊景泰三年六月二十一日午  
時據寶慶府武岡城步巡檢司火牌報有橫嶺莫宜江  
頭高平大地大侯獨宿黃茅坪蓬洞上下崖頭上下邊  
溪桃林城溪平水等洞寨苗賊約有一千餘徒到塔溪  
冲駐劄聚衆等候賊稱說要打開十圖徑出武岡攻打  
水南橋長街當時又據打信軍人王瘦兒等報苗從地

名塘泥隘惟塘市吳家平等處分投三路不計其數前來據報當督原領官軍分投於賊出要路藏伏至二十日已時分果有苗賊三千餘徒張打黃白旗號三路前來臨城吶喊攻劫關廂各職當將官軍分爲三哨王福與同署都指揮汪迪等各督漢達官軍指揮夏宗侯俊等奮勇衝入賊陣殺敗賊衆就斬獲首級一百一十七顆生擒三名中箭傷走者不計其數奪獲苗賊器具旗鎗等件督軍追至地名惟塘等處各苗奔遁去訖官

軍全勝收軍回州除將生擒會同見在武岡布按二司  
委官照磨王泰檢校蕭必忠審係扶城等洞藍正明盧  
善字盧肖子等首級驗實發與州所梟掛生擒賊人監  
候取領備照蒙鎮南王將綵段與王福汪迪及旗牌千  
戶陶成等掛紅緣係擒殺苗賊事理合行呈乞施行得  
此先據署都指揮汪迪呈報苗賊聚衆要行攻打武岡  
州關廂長街當職與同原差旗軍百戶楊暹等親率漢  
達官軍於六月二十五日前進到綏寧縣據指揮王福

等呈報前項賊徒盡行殺敗捷音齎報除領官軍仍回靖州等處哨領外手本到院查得先准總督守備湖廣邊境左叅將都督陳友手本爲賊情事開據署都指揮僉事汪迪呈依蒙統領漢達官軍前去會合守備武岡署都指揮范真軍馬截捕苗賊六月十五日到於綏寧縣當差百戶方總馳驛前去會合外至十七日到於關峽劄營據黃陽平寨民人季仁宗等報有苗賊三起約有九百餘徒見在黃茅堡駐劄當領官軍兼程前進十

八日酉時分到於黃茅坪剗營除差本處五開衛屯小旗張清緝探前賊果有在彼又有二起賊人在近各處鄉村剽掠等因回報到職除選精壯官軍前去緝探裝伏外爲因賊多軍少遣牌前去會合守備都指揮范真多帶官軍前來尅於十九日寅時夾攻隨准范真咨文會合緣由到職本職等率領官軍與賊對敵就陣殺死蠻人數多前賊退於高山駐劄各賊因見官軍數少及各處剽掠苗人聚衆協同前賊復來迎敵官軍奮勇殺

賊竝無武岡軍馬前來策應竊思武岡官軍相離三十里之程已有咨文會合尅期及至對敵之時俱聞砲聲故不策應備呈得此照得守備武岡署都指揮僉事范真呈及靖州綏寧縣火牌報稱武岡城步管屬各洞苗賊聚衆流劫各處民寨呈乞分調漢達官軍前來協同截捕已經委調署都指揮汪迪統率漢達官軍於本年六月十三日前去武岡會同署都指揮范真官軍相機截捕去後今呈前因叅照署都指揮僉事范真所領官

軍民壯不下四千在彼守備本處地方累被苗賊劫掠  
鄉村離城五里畏縮不出及至署都指揮汪迪領軍行  
文約會殺賊相離三十餘里不行依期前來且靖州調  
去官軍行途五程方到黃茅人馬疲敝况彼處賊多軍  
少設有挫失豈不誤事等因手本前來查得先節准兵  
部咨該巡撫湖廣本院右都御史李實并內官梁還及  
湖廣都布按三司巡按監察御史等官奏稱武岡地方  
城步扶城上下岩頭并原撫蘭牛等洞苗人聚衆在於

本州拜新寧縣地方等處流劫鄉村等因該部議擬令  
臣督同守備湖廣邊境都督陳友等調度官軍運謀設  
策作急撫捕前賊務在日下盡絕以靖地方以安軍民  
不許推調遷延以致長奸玩寇仍行巡撫右都御史李  
實嚴督都布按三司委官著落所在軍衛有司整搦官  
軍民壯固守城池以備總督等官調遣策應殺賊毋得  
纖毫怠忽致誤事機奏奉聖旨是欽此欽遵備咨到職  
除欽遵外爲照武岡城步等處地方賊情先已勦撫寧



息續該湖廣署都指揮僉事范真并添撥官軍四千餘  
衆在彼守備又有布按二司分守并巡察邊務等官提  
督操守而臣見在貴州調彼官軍征勦東苗及四川草  
塘等處苗賊相去武岡隔越萬山豈能遙制定奪已經  
節次通行都督陳友及范真等整搦守備官軍民壯人  
等務將前項出沒賊徒設法撫捕盡絕其實回報及差  
官舍楊暹等齎執旗牌嚴督去後今該前因緣武岡出  
劫賊徒既被都督陳友督調署都指揮僉事汪迪等統

領漢達官軍前去殺敗緣係捷音合當馳報叅照武岡  
一境先因守備等官不行用心防守致彼廣通等謀爲  
不軌差人招誘已撫苗蠻復聚爲惡累經委調都督陳  
友等領軍前去綏寧木洞等處截殺敗遁地方復就寧  
息今武岡添調官軍至於四千有餘專一在彼守備而  
范真安坐城中一任賊寇不時出沒略不哨捕防禦止  
據里老人等告報申呈而巡撫等官雖則節次具奏竝  
無到彼親歷巡督及至叅將都督陳友委調都指揮汪

迪領兵前去尅期會合其范真等仍又畏縮違期不行  
策應若非汪迪等官軍奮勇殺敗彼賊何由而退似此  
違誤事機合拏問罪及照巡撫都御史李實亦不遵照  
原奉欽依內事理嚴督都布按三司并巡察邊務分守  
等項官員在彼調度策應止令照磨檢校等官虛應故  
事豈能督調官軍防守地方似此方命俱合原情問罪  
庶警其餘緣係殺賊捷音及問前項失誤官員事理具  
題又該欽差都知監左監丞梁還亦題前事內叅出武

岡州守備官軍在城食糧安坐不肯哨捕賊寇及湖廣  
守備等官不行用心隄防致令賊寇反復等因該本部  
官欽奉聖旨兵部知道欽此欽遵通抄到部查得先該  
巡按湖廣監察御史張瀚題稱守備武岡署都指揮僉  
事范真等明見苗賊四散流劫離城五里坐視不救要  
行拏問等因本部爲照武岡地方賊寇猖獗緊用將官  
守戰合無將范真等令巡按御史取具范真等死罪招  
服殺賊立功贖罪等因具題奉聖旨不問著巡按御史

取了死罪招仍捕前賊再不用心不饒欽此除欽遵外  
續該王來題稱武岡已有巡撫都御史李實另委都指  
揮范真添撥官軍在彼守備各官却乃仍恃徼倖罔知  
警畏致使賊徒窺伺不時出沒重加黜罰另差的當官  
員體覆處置等因本部又經議擬王來李實俱係右副  
都御史王來則總督軍務李實則巡撫地方品秩既崇  
委托尤重又有總兵叅將巡按三司官員難再差官合  
無通行差人齎文與王來李實各官務在和同共濟國

事將武岡賊寇調度官軍民壯上緊撫捕不許結構是非有乖大體等因具題奉聖旨是欽此欽遵今抄前因除都指揮范真已蒙恩宥外叅照右都御史李實職專巡撫所在軍民事情并賊寇患害皆當區畫措置用圖安全及都布按三司官員俱係方岳重寄職任軍民遇有地方賊盜生發則當以身先下設法撫捕今各官視爲尋常致賊得計既該王來叅奏俱合究治但李實係巡撫重臣地方正用人整治合無差人馳驛齎文前去

切責李實拜都布按三司今後務在上體朝廷委任之  
重下念地方生靈之苦遇有所在賊情軍務若總督總  
兵等官一時不在巡撫三司官彼此和同計議調度官  
軍民壯相機撫治不許似前推調耽延致賊滋蔓重貽  
後患仍將武岡未盡餘寇作急撫捕盡絕以爲經久無  
虞之計不許仍前怠忽誤事仍差人齎文與王來公同  
總兵官梁瑤叅將陳友調度官軍兼同武岡州原有官  
軍民壯埽除殘寇務圖萬全之功以盡厥心毋徂一時

之勝遂有怠忽毋爭睚眦毋乖大體其有功官軍自有定例陞賞不許心懷不平重復煩瀆聖聽及因而縱賊復作重爲人民之患緣奉欽依兵部知道事理具題景泰三年八月十三日奉聖旨是欽此

兵部爲乞恩保安邊境軍情事兵科抄出廣西布政司桂林府知府吳惠等奏准本府知府吳惠關前事照得廣西地方險遠山深谿洞槩係夷獠編民十無二三自古及今戰鬪不息設使兵食有餘則凡總戎可以坐制



不難若兵少而糧不足欲使苗寇不大肆猖獗而不遺朝廷之憂者未之有也竊見左副總兵都督僉事武毅當兵食不足之秋獨任廣西一面不曾誤事可謂難矣何以知之緣自正統十四年廣東賊人黃蕭養作耗本官爲叅將征進未及半年廣西蠻賊接壤蜂起惟本府所屬修仁荔浦等縣猖獗尤甚所至敵殺官軍焚燒營堡殘破縣治搶奪庫藏殺虜男女不計其數官吏軍民漫散不知下落近而廣西三十里外皆爲賊壘負郭居

民皇皇晝夜走避城中遠而柳慶等府水陸不通彼時喪失官軍不知其數雖有總兵官田真卒無可奈何遂至憂忿成疾而斃以後武毅克平廣東旋師在途先用信牌差人招出修仁荔浦等處首賊無慮數百悉赴軍前俯伏謝罪面聽撫諭回巢於是各縣官吏居民仍復如故連年地方稍安續被湖廣武岡州廣通王謀爲不軌差人邀結所屬義寧縣都廩等寨首賊楊文伯等統領苗兵要行反叛本賊思慕武毅平日信義不肯聽王

邀結却去僞受官爵等項不從其後王反而地方無虞  
都尉等寨徭獐不下萬數俱各安居住種皆武毅之力  
也及本官自任總兵以來思念出身廣西起自千戶之  
微叨膺今上明聖付託之重夙夜惓惓惟知訓練士卒  
以靖地方以圖補報本分之外竝無毫髮科擾有司亦  
無軍民嗟怨此係衆所共知均有兩廣軍功而又不至  
驕矜其爲賢將世豈多得哉今聞本官被劾降用一節  
但恐所劾之事遙聞不的設武毅果有貪婪違法等事

官必不容縱坐視兼有按察司及巡撫邊務等官俱係風憲亦豈容默然不言雖蒙聖恩不忍提解問罪此天地覆育之深恩爲武毅等將何補報第臣所惜者方今朝廷正係邊境有事用人之際豈因曖昧苞苴之故輒肯降黜名將尤慮在邊武臣從而解體且廣西軍少糧乏兼以被賊去處不能耕種連歲田禾薄收人民缺食見今天時亢旱柳慶等府饑民流離餓死走失者甚多邊患危窘至此極矣尚賴武毅生長廣西熟知邊鄙夷

情連年鞠躬盡瘁整理地方雖無甚寧息亦無甚可憂  
況臣所屬修仁荔浦係盜賊淵藪其反側之徒動以萬  
計一聞舊總兵降責心懷疑懼或再反叛扇動各處猺  
獠禍難復作後將有不勝之患矣臣濫守斯土將及九  
年雖才不堪頗知邊情設或畏避不言其後地方誤事  
罪將安逃且臣與武毅分雖不同而利害實有所關繫  
故不敢緘默上干聖聽伏望皇上憐念廣西係國家重  
邊遽年征戰不絕只今地方多事屢報賊情不絕軍民

疲弊已甚乞垂睿覽俯察臣言若武毅情犯果有可矜  
可疑乞賜聖恩開釋無辜仍還節鉞協同新除總兵用  
心整理地方實爲社稷之福邊境之幸備關准此緣係  
保安邊境軍情重事具奏該通政使司官奏奉聖旨廣  
西地方蠻夷讐殺不常武毅在彼年久熟知夷情兵部  
計議停當來說欽此抄出到部查得先該兵科右給事  
中黃仕儁題稱廣西賊寇猖獗民被其害急如水火武  
毅等欲待秋月然後會兵勦殺其緩師縱敵莫此爲甚

且古人救災恤患不暇擇時武毅等不念生靈肝膽塗地即爲拯救何忍待秋而後舉乎又武毅往往以廣東班軍不至爲辭顯是推調畏怯不行用心以致賊窺其端因而猖獗民遭連歲劫殺之害軍受積年暴露之苦且聞本官近日以來操守甚是不潔故其臨賊以致流連乞計議選差素有風力御史一員前去體訪武毅等有無貪虐情由應否存留取回免致遺患等因具題本部已經依擬覆奏行移都察院差御史請勅前去體察

外續該欽差監察御史王允題稱訪得都督僉事武毅等自到廣西守備號令不嚴專一剝削軍士且如湖廣每年該調輪班官軍若到廣西武毅等每衛官軍名下索要拜見銀一錢入已俱係主文寫發軍人胡朴等過送景泰二年巡按御史依奉都察院劄付查出桂林中右二衛官軍戶下成丁餘丁王紀等共六千四百七十二名照例相兼官軍操守城池今訪得此等餘丁並無操守及體得馴象衛鎮撫馬驥係軍前聽調人數今却



買閑在家又不隨操致被本衛知事方岳舉呈事發中  
間顯有武毅等賣放情由比之已故總兵官山雲守備  
之時勇智廉介號令嚴明猺賊聞之心寒膽戰大不侔  
矣况武毅貪濫之狀大著於兩廣科擾之弊流及於三  
軍致使被害良民死者怨氣衝天生者哭聲動地罪惡  
至斯人皆痛恨武毅年已六十之上筋力日衰威名日  
退以此土官之不信猺賊之肆劫合將武毅等差人提  
取來京送問仍乞另選素有勇智廉介如山雲武臣前

來更替以爲地方保障等因具題本部又經議擬合無將鎮守涿州良鄉署都指揮陳旺量陞前去廣西充副總兵代替武毅降爲事官就於彼處跟隨總兵官立功殺賊等因具題節該奉聖旨是陳旺陞署都督僉事充副總兵代替武毅鎮守地方武毅降做爲事官就於本處聽總兵官調度殺賊有功時定奪欽此欽遵已經通行欽遵去後續又該武毅題稱廣西所屬府州縣良民數少猺獞數多自前至今作耗不息詳其所以蓋緣臣

係廣西都司金州千戶所副千戶遞年聽受總兵官指  
示方略立有微功屢蒙聖恩陞授都督僉事充副總兵  
掛印鎮守才智短淺猥承重任不能除暴安民有負朝  
廷付託恐因循積久有誤地方況臣自永樂年間以來  
征勦賊寇三次被藥箭傷一次被石礮傷幸延殘喘至  
今六十二歲氣衰力弱箭風時常舉發則頭疼目脹嘔  
吐頻煩彌旬不能理辦軍務以致誤事竊照比先總兵  
官都督山雲安遠侯柳溥鎮守廣西俱自朝廷命遣前

來猺獞土人畏懼不敢恣肆今湖廣廣東等處各有內  
臣在廷軍職大臣鎮守總兵乞勅內臣一員在廷軍職  
大臣一員前來廣西鎮守總兵等因具題節該奉聖旨  
內臣司禮監整理欽此又經通行欽遵去後今抄前因  
臣等竊照廣西地方係是巨藩大鎮諸種蠻夷駢居錯  
處比先年間節該總兵官韓觀山雲柳溥等相繼守鎮  
行事出於至公蠻人歛手聽命令行禁止上下相安遇  
有調遣隨即啓行以致寇盜不作地方安妥自武毅充

副總兵鎮守廣西二三年之間節該本官同鎮守巡按  
三司等官及土官衙門具奏桂林柳州平樂梧州等府  
永福荔浦來賓等州縣報有賊寇或二三十起或六七  
十起攻打城池燒毀村堡殺虜男女剽掠財畜聲息殆  
無虛日生靈略無寧歲軍疲於戰守民困於轉輸戰骨  
隨處而有哭聲無處無之上而辜負國恩下而感傷和  
氣若使武毅頗有謀勇善於處置則一方賊寇之禍必  
不至如是之慘今武毅貪懦無狀威令不行貽害生靈

流毒良善近侍之官發之於前風憲之臣實之於後武  
毅自知不爲所容上章陳情退避已蒙聖斷俯念一方  
生靈另行差官前去整治而吳惠係一府官其責任在  
於宣化承流撫安百姓今武毅素無統馭之才以致蠻  
賊流毒民受其害吳惠不此之慮因係附近府分久在  
武毅治下人情稔熟顧乃不恤大計不畏國法不體公  
道上言武毅德政原其所由必是武毅與同彼處巡撫  
三司官員因見朝廷從公處置將武毅量情降黜主使

吳惠上言武毅之長遮護各人之短苟爲日前之謀不思經久之計其爲懷奸不忠欺罔之罪莫甚於此及照武毅既是熟知邊情緣何先前京師差御史王允前去體勘吳惠不行申達辯明及至體審回奏處置已定方纔誇張謬論煩瀆聖聽情弊昭然可見中間又言要行仍還武毅節鉞協同新除總兵行事一節緣總兵所以專閫外之計其可竝用二人而使之互相掣肘跡其所言大抵欲行一己之私以壞朝廷之事其爲繆戾不忠

尤難容恕若不重爲繩治非惟奸詐之徒肆無忌憚抑且邊方大事因而廢弛除武毅已奉聖斷降爲事官本處聽總兵調度別無定奪外合無行移都察院轉行巡按廣西監察御史將吳惠提取究問聽信何人主使具奏前項情由議擬明白牢固監候奏請發落本部仍行總督兩廣軍務太子太保兼都察院左都御史王翱公同副總兵署都督僉事陳旺查勘彼處賊情即今若未寧息務在竭力運謀相機撫捕以爲一方之保障以洗



往日之陋習不許輕易怠忽殃民玩寇其武毅照舊令其聽調殺賊毋得展轉營求自取重罪如此庶使處置合宜機務不誤緣節該奉欽依兵部計議停當來說事理具題景泰三年閏九月初四日奉聖旨是吳惠有爲民之心不問還行文書與他知道欽此

兵部爲陳言邊患等事兵科抄出巡撫廣西兼提督軍務刑部右侍郎李棠題節該欽奉勅近得御史奏廣西賊情七十二起多係流劫鄉村殺掠民財燒毀村堡重

事并稱都督武毅叅將范信守備號令不嚴專一剝削害民索要銀兩賣放軍士餘丁上下互相蒙蔽等因以此盜賊得以縱橫連年用兵有敗無勝兵民受害不可勝言爾爲提督之官所職何事而致如此法司奏爾顯有通同故縱等項情由乞加究問朕念用人之際姑寬宥爾已將武毅等降用外今命太監班祐與同總督軍務太子太保兼都察院左都御史王翱并命署都督僉事陳旺充副總兵前來爾處調度軍馬撫捕賊寇勅至

爾即洗心滌慮持廉秉公凡有一應軍務等事必須會同協助從公計議而行欽此除欽遵外臣竊念一介草茅叨蒙任使守邊禦寇本非所長上勞聖憂下貽衆怒不職之罪固莫勝誅幸殊恩曲加寬宥措躬無地日夜慚惶然考之唐陸贄有言曰據理辯真則涉於私黨之嫌希恩順情則違於臣輔之義涉嫌止貽於身患違義實玷於君恩贄之斯言臣所佩服故於邊方事宜不敢避嫌隱默謹條陳於後廣西之境自正統十四年以來

湖廣廣東草賊生發廣西各村峒蠻寇乘虛蠭起圍困撫州來賓等處城池攻破修仁荔浦等處縣治敵殺官軍劫虜良民難以遍舉桂林東南至於潯梧西南至於柳慶水陸道路阻遏不通兵民受害莫此爲甚前總兵官田真爲因兵少不能制服得病身故景泰元年七月間左副總兵都督武毅從廣東回還就在梧州遣牌招撫立山荔浦修仁等處蠻寇出官向化一帶江路漸可通行本年九月武毅同臣與巡按御史三司官領軍前

去柳州府駐劄調到各處土兵議欲分投勦殺爲因巢  
峒廣濶蠻夷數多官兵土兵不勾分布猶慮舉此遺彼  
後事難圖遂將軍兵屯操耀武振威招撫兇獷之徒漸  
輸款附後就移兵將全州與湖廣武岡州接界地方及  
鬱林州天容山等處徭寇勦殺數起獲首級一千餘顆  
景泰二年四月內柳州府馬午等縣積年賊首韋朝天  
韋公猛等糾合一千餘徒從融縣清流鎮渡江聲言直  
抵桂林地方行劫武毅與叅將孫騏左叅將范信五路

出兵相爲犄角殺敗賊衆斬獲賊首韋公猛等首級七  
百餘顆兵威振揚賊頗斂迹本年十月內宜山縣首賊  
韋萬秀等以地方爲詞流劫不息奏調軍兵抵巢勦殺  
已斬獲賊級九百餘顆正分兵搜捕間因田州府土官  
知府岑紹病故土兵潰散各首賊不能全獲班師之後  
又復猖獗隨調都指揮彭英前去招撫一向未盡寧息  
景泰三年夏月以來右叅將孫麒哨節次殺獲北三等  
處首賊韋多烹韋公寫等并從賊首級一百五十八顆左

叅將范信哨殺獲大藤峽等處首從賊人侯通三等首  
級二百三十七顆自景泰元年八月起至景泰三年八  
月止各處抵巢并挨捕通獲首從賊級四千一百七十  
五顆生擒偽稱勝道君王賊首盤勝子奪回被虜男婦  
一千五百七十一名口前被官軍殺賊止是本年二月  
并七月內孫麒調指揮爾顯等在河池地方武毅調指  
揮范義在金州地方各與賊對敵傷故官軍俱係會奏  
明白不敢隱蔽其餘用兵不計起數上賴宗社威靈國

家厚福屢能尅敵且無喪敗但緣廣西古號久反之地  
洪武永樂年間兵力衆盛蠻寇流劫不能全無況今兵  
少寇多一時不能盡滅羈縻控制自古皆然目今雖不  
全安頗亦勝於去歲顧此邊夷之境實與內地不同事  
必徐圖方可寧一武毅范信已蒙降用所奏各官受財  
賣放軍士餘丁情由乞勅法司拘集被害并出錢之人  
審勘如果是實明正其罪使受罰者無詞言事者有據  
且邊將之任民夷具瞻黜陟廢置關係非小伏惟聖明



俯垂昭鑒臣稟性昏愚罔知兵務下不能庇邊民之命  
上不能分朝廷之憂前罪蒙肆赦之恩末由報稱後事  
監負乘之戒益切冰兢今蒙差太監同左都御史等官  
共理邊務各官至日相宜處置况即目廣西旱災相仍  
民遭困苦揆厥所自豈無其由實以臣之不職致於如  
此古人以災異策免大臣亦是常理伏乞聖慈憫臣愚  
陋容臣將原降關防并原奉勅書進繳削去官名放回  
田里一以償不職之罪一以謝神人之怒庶回天意以

救民生臣不勝犬馬感恩待罪之至具題該通政使司  
官奏奉聖旨該衙門知道欽此欽遵抄出到部查得先  
該欽差監察御史王允題稱廣西副總兵都督僉事武  
毅自到廣西守備號令不嚴專一剝削軍士且如湖廣  
每年該調輪班官軍若到廣西武毅等於每衛官軍名  
下索拜見銀一錢入已俱係主文寫發軍人胡朴等過  
送景泰二年巡按御史依奉都察院劄付查出桂林中  
右二衛官軍戶下成丁餘丁王紀等共六千四百七十

二名照例相兼官軍操守城池今訪得此等餘丁竝無  
操守及體得馴象衛鎮撫馬驥係軍前聽調人數今却  
買閑在家又不隨操致被本衛知事方岳呈舉事發中  
間顯有武毅等賣放情由比之已故總兵官山雲守備  
之時勇智廉介號令嚴明徭賊聞知心寒膽戰大不侔  
矣武毅貪濫之狀大著於兩廣科擾之弊流及於三軍  
致使被害良民死者怨氣衝天生者哭聲動地罪惡至  
斯人皆痛恨武毅年已六十之上筋力日衰威名日退

以此土官之不信猺賊之肆劫令將武毅等差人提取  
赴京送問仍乞另選素有勇智廉介如山雲武臣前來  
更替以爲保障等因具題抄出本部已將武毅等叅據  
并照出侍郎李棠係提督軍務巡撫地方官員武毅等  
穢跡彰聞李棠與之共事公然蒙蔽不以上聞中間顯  
有通同故縱情由亦合究問但緊關用人合無請勅李  
棠務在洗心滌慮持廉秉公凡有一應軍務會同總兵  
官從公計議施行事有窒礙亦須執法舉正自總兵官

以及管軍頭目若有貪財壞事指實具奏不許貓鼠同眠同惡相濟以玷名爵等因具題節該奉聖旨李棠寫勅去切責他著洗心改過同總兵等官協和行事再仍前怠惰悞事不饒欽此除欽遵外今抄前因叅看得李棠所奏前項事情大抵因見朝廷降勅切責令其洗心改過并將武毅降黜以故心懷不平言涉怨望假以災異免官實欲飾非文過一則遮護武毅一則遮掩自己臣等竊惟朝廷之恩固多從夫寬宥而大臣之心當益

加夫敬謹今照廣西賊寇之患非止一日人民被災不可勝言查得自景泰元年起至今二三年之間節該武毅李棠及巡按三司府州縣土官衙門具奏賊寇生發共有七十餘起殺虜官吏軍民人等共一萬六千之上燒劫倉糧二萬三千剽掠牛馬頭畜一萬有餘并燒奪船隻布鈔皮張衙門樓櫓村寨不可數計自古受兵之慘莫過於此其李棠既已巡撫地方又兼提督軍務民之肝腦塗地而不加恤朝廷之恩澤如天而不知感方

且調弄虛文欺罔天聽揆之國典刑章尤有甚於武毅  
合當行提問罪以爲人臣不恭者戒緣本官先前已蒙  
恩宥即目廣西賊情未寧正係緊急用人之際合無差  
人馳驛齎文與李棠令其照舊在彼提督軍務與同副  
總兵陳旺等務在彼此同心共濟國事其有一應賊情  
未寧地方未妥必須從長議設方略隨宜撫捕務俾患  
害祛除人民安堵以副付託之重以爲保障之計不許  
心懷疑忌陽予陰擠忌嫉功能推託利害以致政令不

一人無表率因而號令不行長奸玩寇如違定行治以重罪緣奉欽依該衙門知道事理具題景泰三年閏九月二十三日奉聖旨李棠在彼賊寇生發不能與總兵等官協同和謀殄滅以除邊患既容他過却又飾詞遮掩已罪行文書與他知道今後著洗心改過凡一應事務須與陳旺等計議而行再誤事不饒欽此

兵部爲守備地方事兵科抄出總督軍務都察院右都御史王來題景泰三年九月二十二日准兵部咨兵科



抄出貴州都司等衙門都指揮同知等官張銳等題照  
得貴州僻在西南極邊與諸種蠻夷雜處其人性情無  
定叛服不常喜則相聚以安生怒則讐殺以爲患從古  
皆然爰自洪武年間開設衛所控制防禦誠爲良法且  
貴州等二十衛所比先原額旗軍一十四萬五千二百  
七十六名以守則堅固以調則勾用所以七八十年之  
間軍民安堵邊境以寧往者節因調征麓川等處旗軍  
消耗數多苗賊窺伺空虛以致正統十四年被湖廣洪

江及四川重慶等府賊首韋同烈等僞稱王號總兵等  
項名目扇聚各處苗賊張打旗號舉鳴金鼓攻圍城堡  
劫殺軍民仰荷朝廷憐念生靈欽命總督憲臣及總兵  
等官興師征討即今賊首就擒餘賊從撫邊患稍寧其  
軍見進東南平伐乖西平浪及四川播州所屬草塘等  
處分投駐勦將漸克平班師在邇但貴州所屬各衛軍  
士見在多者不過五七百名少者僅有二四百名雖是  
類行各處清勾見今到衛數少委的邊備之人若不存

畱官軍守備誠恐班師之後蠻賊又復乘虛出沒深爲未便看得威清普定平越畢節四處比與各衛尤爲要害之地如蒙乞勅該部計議合無將雲南四川見今征進官軍行令總督總兵等官於內摘畱一萬五千員名分與前項威清等處守備每年輪班更替遇警聽調候各處清解軍士到衛完足另行奏請定奪實爲邊方經久之計可免官軍征調之勞緣係守備地方重務會本具題該通政使司官奏奉聖旨兵部知道欽此欽遵抄

出到部叅照所奏係干重務未經勘議難便定奪合就移咨前去煩爲會同副總兵都督方瑛查勘前項征進官軍應否存畱守備有無窒礙明白具由回奏施行准此查得先據貴州都布按三司等衙門都指揮同知等官張銳等會議前事爲照大軍先已分遣貴州普定四堡金筑東苗草塘乖西大小平伐等處地方勦撫寧息見今又進都勻平浪等處會兵勦捕已就克平所據前項征進官軍俱係原征麓川孟養之數經年在外又因

駐劄日久逃故者多誠恐糧儲缺乏聽候艱難已經行  
准副總兵右都督方瑛手本議得貴州所屬地方先因  
苗賊出沒攻圍城池流劫屯堡官軍傷餓而死十無一  
二今雖大軍撫勦暫寧緣各衛所委的官軍數少不敷  
防守合於雲南四川行都司征進漢達官軍內量畱一  
萬二千五百餘員名相兼各衛官軍分守威清平壩平  
越畢節赤水等處一年一替遇警調用控制苗賊以保  
邊疆待兵食稍足邊務修舉之日各回原衛操守將擬

定緣由并存留漢達官軍總數開報又經依擬通行留撥守備去後今准前因仍行右副總兵都督方瑛勘議相同外叅照貴州實雲南之喉襟四川之關隘防貴州之邊即安雲南四川之境尤恐彼處官司不思地方係是公同所繫輒又託故展轉誤事不便緣係議留官軍守備地方事理合無該部通行雲南四川都布按三司照依原留官軍名數各選都指揮一員管領每年依期前來輪替庶免遲誤爲此今將議留守備官軍員名開

坐具題該本部官奉聖旨兵部知道欽此欽遵抄出到部案查先爲前事已經查勘去後今抄前因叅照所奏既已彼處總督副總兵等官勘議區處已定別無定奪合無准其所擬行移總督軍務右副都御史王來會同都督方瑛從長計議將前項雲南四川征進漢達官軍內依數量畱一萬二千五百餘員名選委能幹驍勇都指揮一員管領相兼各衛官軍分守威清平越等處地方控制苗賊保守邊疆遇警一體調用仍令一年一換

依期輪替待以後兵食完足邊境無虞另行奏請定奪  
不許私役苦害因而逼迫逃移緣奉欽依兵部知道事  
理具題景泰三年十月初九日奉聖旨是欽此

兵部爲班師事照得近該巡按貴州監察御史等官邵  
進等題稱湖廣貴州等處苗賊平息邊境寧妥要將雲  
南四川官軍量畱守備其餘見征官軍合當疎放等因  
本部議擬具題該奉聖旨便寫勅與方瑛陳友每在彼  
領軍鎮守但有賊寇生發務要設法勦捕盡絕王來梁瑤



梁還等都著回京欽此欽遵外查得先該總督軍務右都御史王來題稱貴州所屬地方俱係苗夷之境控制之法要在整飭兵戎撫恤之方尤在除草奸弊今湖廣四川雲南三處地方軍民疲困不勝雖猖獗之賊已將擒勦敗散之衆悉皆招復譬之久病之人纔得少瘥必須保養調息庶幾可至安全竊恐地方寧靖之後軍衛有司視爲無事即加剝削罪雖有在實貽邊患以臣愚見須擇剛毅有才識卓立之官以撫治之然後邊患可

除蠻夷可撫要將貴州布政使司右叅議盧斌量陞京  
憲職事撫治貴州地方等因具題奉聖旨吏部兵部計  
議來說欽此欽遵會議得叅議盧斌職居方面撫治人  
民分所當爲及照貴州見有右都御史王來在彼總督  
軍務今本官具奏要將盧斌陞任京憲職事查得都察  
院都御史見任二十六員難再除授合無就令右都御  
史王來在彼巡撫總督軍務班師之日另行具奏定奪  
等因具題吏部等衙門太子太保兼本部尚書王直等

奏奉聖旨是欽此欽遵已經通行去後今該前因緣右都御史王來係欽命巡撫貴州兼總督軍務官員即今彼處雖稱苗賊稍平未見十分寧靜正當撫摩存恤庶令事安民安兼且各處俱有文職大臣職專巡撫地方貴州又係緊要去處似難缺人管理所據右都御史王來合無照依今奉欽依事理令其隨同回京惟復照依先奉欽依事理令其在彼巡守專一撫恤邊民俾其安生樂業遇有草寇生發會同方琰計議相機撫捕務在

同心協力以濟邊事不許互相矛盾自取罪愆緣係處置巡撫官員事理未敢擅便具題景泰三年十月十三日奉聖旨是貴州地方窄狹王來著回京巡撫官別選欽此

兵部爲預防邊患事內府抄出總督廣西軍務尚膳監太監班祐題景泰三年七月內欽奉勅諭往廣西總督軍務鎮守地方除欽遵於本年九月二十九日到於廣西欲行整搦官軍先到緊要徭獐去處就便因而撫恤

查得廣西在城止有官軍一千三百一十五員名舍餘  
家人一千一百七十二名數少不敢輕出及查得在外  
雖有調到湖廣廣東廣西官軍止實有二萬九百二十  
七員名分守潯梧柳慶等一十九衛所并永福等縣堡  
五十二處俱係萬山猺獞衝要賊人去處尚且不敷操  
守亦不敢輕動臣會同總督兩廣軍務太子太保兼左  
都御史副總兵侍郎等官王翱等計議節次出榜撫諭  
遠近猺獞自昔爲惡不肯出官舊賊韋公寧等約有八

百餘名陸續俱來廣西軍前伏聽省諭管待回還暫皆  
順服目下稍得寧帖緣廣西地方二年不收軍民徭獐  
見俱缺食恐饑窘急迫開春必致動作仍復爲患不即  
勦殺諸處倣倣爲患不小比時土官土兵各照常年定  
例回還農種有急卒難起調若不預先斟酌區畫臨期  
悞事取罪非輕如蒙准題乞將南京江西袁贛等衛所  
見操官軍內那調二三千員名前來操練守城遇警廣  
西官軍出哨策應殺賊候明年地方頗有收成賊少生

發陸續送還原衛實爲便益具題該本部官欽奉聖旨  
兵部知道欽此欽遵抄出到部叅照奏稱要將南京江  
西見操官軍那調二三千員名前去廣西操守殺賊一  
節緣南京係祖宗根本重地守備不可缺人官軍不可  
輕動其江西地方相去廣西遠兼且所在軍衛官軍  
數少而又不習廣西水土若准調去非惟事體不便徒  
爲煩擾尤恐衝冒瘴癘因而失所難以准理合行移文  
總督兩廣軍務太子太保兼左都御史王翱會同太監

班祐副總兵陳旺等公同計議從長區處將彼處見有官軍用心提督操練鎮守地方遇有賊寇出沒守戰不數量調湖廣廣東輪班官軍并所在土兵隨宜設法調度相機勦殺毋得指以軍少爲由因而坐視邊患致誤軍務緣奉欽依兵部知道事理具題景泰三年十一月十一日奉聖旨是欽此

兵部爲邊情事准禮部咨禮科抄出提督軍務刑部等衙門左侍郎等官羅綺等題准兵部備禮部咨禮科抄



出巡撫四川都察院左僉都御史李匡題差委陰陽典  
術袁釗伴送棟巴差來番僧回還就令將原占雜谷達  
實愛滿地方印信退還各司掌管近據袁釗回說雜谷地  
方印信棟巴送還達實愛滿地方亦退還本司頭目掌管  
印信係番僧喇嘛齋往魚通遊方未回舊維州地方棟  
巴不肯退還等語及將棟巴書一紙討御製大誥爲善  
陰隲孝順事實洪武韻周易尚書毛詩各一部其中詞  
語甚恭足見洗心向化乞勅禮部將所求書籍酌量加

賜因而勅令將舊維州退還保縣彼必感恩知報具題  
該禮部官欽奉聖旨該衙門知道欽此欽遵除書籍另  
行外移咨到部案照棟巴今雖要將舊維州退還保縣  
誠恐本人貪戀地方人民不肯退還并雜谷違實愛滿雖  
稱退還未見著實其稱印信帶出遊方俱屬虛詐合候  
行移羅綺公同鎮守指揮周貴計議其於夷情邊務如  
果棟巴草心向化實有尊事朝廷之心就便差人齎文  
與科爾壘嘉勒築以謂爾奏討書籍朝廷已允其請但舊

維州地方退還保縣已見忠誠仍令羅綺審勢度情處  
置停當具題奉聖旨是欽此欽遵備行移咨准此時會  
同鎮守松潘都指揮同知周貴查得先該棟巴罕呼都  
指揮同知科爾壘嘉勒梁中奉左僉都御史李匡劄付將  
舊維州退還保縣掌管本番回稱舊維州係雜谷家搶  
得不在漢人手裏搶得有這等鈞旨我九日想九夜夢  
也不夢出來這舊維州沒有拳頭大一塊石山你每不  
要尋取若尋取時這一場讐殺一千年也不盡詳觀此

語實包禍心宜以賊首嚴防不可至誠相待近該招諭  
生番指揮周剛回說稱棟巴科爾壘嘉勒察察之生番衆  
多并地方人口要來朝廷投獻納貢本番使人將松州  
迤西地名楊噶爾將本土守把不容生番經過又將馬  
甲銀兩分投給散啖餌夷性取集番人意在置之左右  
助彼聲勢臣恐夷人貪圖微利或於啖餌變易初心仍  
差本官順帶銀器茶米等物帶領官軍百戶劉進等五  
百餘名前去兩番接取投拜生番并探棟巴事情務必

以術籠絡不可遂彼奸計續該招撫通事張伏保方昇  
回還說稱棟巴累次設計用財暗邀夷情要收各番管  
束各役與番人說知朝廷法度利害衆番尋思日久方  
纔聽信將馬甲隨同前來有棟巴不遂奸計將原搶雜  
谷達實愛滿百姓恐與投拜生番會時漏泄事情俱各赶  
入長河西等處住坐臣等詳得雜谷達實愛滿地方見今  
占管百姓俱聽棟巴節制及舊維州本番令人守把議  
得雜谷達實愛滿地方人民於國無益得之不足以爲榮

失之不足以爲辱臣將棟巴所差之人雖稱優待終防  
奸詐所謂洗心向化不可測度又據番僧妙覺禪師端  
珠譯說有棟巴分投差人每番一名給與三梭布四疋  
言如今又說有箇主人你每不要北京進貢都來棟巴  
家進貢你每要銀印也有要金印也有要大官職也有  
將我招得生番赶回不容投拜言語不遜似無君上之  
心臣於棟巴恨不齏粉隨於各番宣諭朝廷恩威將投  
拜爲頭番僧一百三十名做造紵絲及綿布衣鞋襪每

人又賞布一疋酒食優待另行起送已將禮部送到書  
籍先已齋董卜讀誦外况棟巴路通松潘維州保縣寒  
水本番目今狐疑猶豫未決反復無定輒便差人齋文  
著令將舊維州退還保縣尤恐乘機變易初心倘一旦  
生釁則四面長驅臨期爲患卒難收撫臣等熟知禪師  
端珠素爲棟巴讐人所管人衆伏望聖恩將端珠陞以  
國師職事令其保守地方日後棟巴生釁臣將端珠并  
原管之人調遣俾其以夷攻夷自相殘害臣於沿邊修

治餉道增修城池操軍養銳以逸待勞安邊之策不待外求捍禦之功於此有備庶幾以寬聖主之憂以折奸人之計便益具題該本部官欽奉聖旨該衙門知道欽此欽遵抄出到部除奏要將端珠陞以國師職事本部另行外移咨到部案查先爲前事已經奏准另行左侍郎羅綺等勘議處置去後今該前因叅照奏稱棟巴罕呼科爾壘嘉勒榮差人守把雜谷達實愛滿地方及不肯退還舊維州與保縣一節其狡黠無狀陰懷異圖不言可



知若不預爲防範慮恐事出不測臨期有誤機務合無  
差人馳驛齎文與左侍郎羅綺會同都指揮周貴等從  
長計議隨宜區畫整搦所在軍馬嚴謹隄備遇有緊急  
事情就便相機行事其舊維州并雜谷達實愛滿地方如  
果不肯退出不必再三驅迫亦不可許其管束惟當羈  
縻牽制操縱牢籠使彼既不能自起釁端又不能必遂  
奸計及番僧端珠等如果堪以結納於其回還之日就  
便加意撫諭令其戒飭部落固守邊境毋得縱彼爲惡

若有功勞陞賞不愆若遇棟巴罕呼差人到邊尤須外  
示優待內切防閑不許自露怯弱以啓夷人輕侮之心  
及遽爲阻絕以生邊境倉猝之患務在審勢度情謀定  
後動以折夷人之奸計以保地方之無虞如有疎失責  
有所歸緣係處置邊務事理具題景泰三年十一月十  
四日奉聖旨是欽此

兵部爲被賊殺虜人命等事兵科抄出廣西布政司慶  
遠府宜山縣右陽鄉永泰里民人陸淵澄等奏竊見本

縣所轄地方接連谿洞獯獪最多自克復之初歸附立  
籍當差至永樂五年以來有本縣述昆等鄉首賊韋公  
本等依山爲勢不服糧差糾合賊衆流劫鄉村殺虜人  
民蒙總兵官都督韓觀內官雷春將作耗村峒賊徒征  
勦地方一向寧息至永樂十九年首賊韋萬黃等僞稱  
王侯名色糾合柳州府馬平等縣賊衆劫掠州縣殺死  
御史諸瑛等官告蒙總兵等官征蠻將軍鎮遠侯顧興  
祖統率大軍抵作勦捕各賊聞風奔入山林或投於鄰

境土官州縣倚親藏住十無二三及其大軍退後各峒蠻賊仍前出劫民受其害正統七年間本縣知縣朱斌將前項作耗地方奏准撥與思恩府土官知府岑英管治正統十年間有首賊韋萬秀等糾合賊衆流劫本縣鄉村并河寧守禦千戶所驛鎮殺虜軍民萬普等蒙總兵官柳溥統領大軍將村峒賊徒捕勦仍前撥岑英管治後因本官征進廣東不在於景泰元年二月內仍被首賊韋萬秀糾合本縣浴西等里首賊韋萬累等并柳

州府馬平等縣五都首賊藍茹等千百爲羣張打旗號  
流劫臣等寨殺死父陸端廖仕華等及本縣中里等里  
毛村等村寨殺死民人陳志廣等三百八十餘人虜去  
臣母譚氏等男婦二千八百餘口家財房屋盡行燒劫  
雖蒙司府差委人員招撫各峒首賊韋萬秀等不服向  
化日益聚衆愈加猖獗攻打小廖等寨殺死民人莫敬隆  
等以致人民不得安生臣等思得有父被賊殺死屈害  
無辜虜去人口節告府司未蒙追給人民被其擾害今

經四年之上不能住種田土荒無人民餓死在途者有之逃移外境求食者有之致使父子不能相顧兄弟妻子離散深爲失所情實痛切如蒙伏望聖恩憐憫乞勅該部轉行鎮守總兵等官會同都布按三司官員統領大軍將本縣作耗村峒賊徒征勦祛除民害先行差智謀勇敢官員密切率兵於臨境州縣嚴督守把賊人通逃小路方可進兵駐劄跟蹤勦捕所獲原虜良民人口俱送總兵官處准作功次給領完聚務要一年之上衛

民耕種秋成之後家道安置方纔退兵使賊人逃遁者糧食盡絕必遭餓死矣仍於各峒設立長官司衙門或土官子孫有兵力者或向化數內衆所信服者舉保任長官司管束以夷治夷庶使地方寧息實是民得安生永爲利便有此今將作耗村峒首賊韋萬秀等姓名開坐具本親齎具奏該通政使司官奏奉聖旨該衙門知道欽此欽遵抄出到部照得廣西地方先因副總兵武毅等在彼鎮守擁兵自衛畏縮無謀以致猺賊猖獗殺

虜人民已該本部叅奏降黜欽命太子太保兼左都御史王翱總督軍務署都督僉事陳旺充副總兵官往彼鎮守地方專一撫捕賊寇近日以來節奏擒獲賊徒地方寧謐今民人陸淵澄等奏稱前因緣彼處俱有軍衛有司相兼管轄既有前項事情何不具告合于上司轉達總督總兵等官知會調官撫捕却乃驀越赴京訴奏中間恐有別故况干邊務賊情難便定奪除將齎本人令該府發回外欲行總督兩廣軍務太子太保兼左都



御史王翱副總兵署都督僉事陳旺如遇陸淵澄投到  
究問前項所奏事情有無虛詐違礙如果彼處地方見  
彼村峒賊徒聚衆作耗搶掠人口等情俱實即今尚未  
寧息就便運謀設法調兵撫捕務在目下盡絕以除民  
患以濟邊務若是前項地方即今係是寧靜村峒賊徒  
別無作耗情由不當調兵征勦其陸淵澄等所奏別有  
另項緣由徑自究問仍具實回奏定奪務在區處得宜  
俾地方寧靜不許輕易苟且致邊方擾攘緣係處置邊

務及奉欽依該衙門知道事理具題景泰四年正月二十六日奉聖旨是欽此

兵部爲邊情事兵科抄出巡按廣西監察御史張昊題奉都察院劄付准太子太保兼本院左都御史王翱咨爲陳言禦寇救患等事該本官題准帶臣至兩廣理辦軍務臣欽遵前去於景泰三年九月十八日到廣東訪得彼處軍民自洪武年間以來一向安妥後因黃蕭養之徒作耗在所司者不能設法處置惟務偷安兵政無

備以致招集無籍釀成兇禍展轉不能禁遏及至戰艦  
抵岸蠻賊寇城又各畏縮推避略無禦寇之謀相顧倉  
惶莫效安民之策遂使賊兵所至村堡爲墟劫掠其資  
財繫縲其妻子封豕長蛇大肆其毒一方受害不可勝  
言推原其故皆由彼處統馭之將非人既不能安保預  
備於無事之日又不能禁禦招撫於賊發之後故也本  
年閏九月二十一日又到廣西見彼處土人種類非一  
其曰生猺熟猺曰獠人曰伶人曰獠人皆強獷悍

疾之名曰溪曰洞曰寨曰團曰隘咸負固自保之所既無城郭可居亦無溝池可守不過依山傍險爲自全計雖其衣服言語與中國不同然其好惡情性則與良民無異平居之際亦各往來以營生至於有急自相屯聚而保護觀其背叛不服實非本心乃出於不得已也皆緣將臣所司不得其人德不足以綏懷威不足以懾服甚至欺其遠方無告掊剋殘忍使不得安其生謂其蠢爾無知顛倒是非俾不得順其性既害其生又拂其性

雖良善懦弱之人尤不免於動作况素無教令而稟性  
強梁者動之則易安之實難遂致攻劫鄉村侵擾百姓  
或報復私讐或貪取小利或聚或散出沒不時兩廣之  
民日見凋弊殺傷疾患不能聊生上賴陛下神謀廟算  
其首惡俱已殄滅尚有一二餘黨未除以致猶厪聖慮  
命臣等前去撫除差人四散招撫徭老獐老人等總兵  
官會合土官土兵前來申以朝廷恩威之重諭以善惡  
禍福之由彼皆稽顙俯伏歡忻鼓舞許自遷改禮待而

歸及各處猺獞人等所在衆多雖不能一一招撫亦皆轉相告戒臣又密切訪得彼皆自謂朝廷見差大官人每招撫我今後不要出去作反各歸鄉峒生理且臣始到兩廣之時查得賊情尚有三四起自九月以後少有報到聲息間有一二亦皆鼠竊狗偷今亦散去此皆陛下神威遠著聖化旁行遂至蠻夷之徒感恩自服回邪之黨不戮自夷然臣猶未敢保其始終不出以誤朝廷久遠之計蓋彼雖難治情欲可知苟得其所養而安其

所利可保久安若一有所擾而不遂所欲則其反側又必難制臣親臨彼境頗識其情今已回還敢陳愚見冒瀆宸聽伏願皇上量宏天地赦舊圖新仍勅該部行移廣東廣西總兵鎮守大臣并各都布按三司府州縣等官赴此邊務稍靖之時務求久遠常行之計洗心滌慮革去前非其餘前項犺獍人等已歸者必撫之以恩未來者必申之以義號令必信賞罰必公巨惡必誅小惡必宥而又整飭戎伍堅甲利兵以臨之使彼既慕其德

又畏其威則悍然不顧悖然不遜之氣自消矣若有仍前侵剋致生釁端必罪不宥如此則海隅嶺表之民庶得安生不勝幸甚爲此今將所得邊情具題該本官奉聖旨兵部知道欽此欽遵抄出到部臣等竊惟地方之安危係乎人情之得失人情得則轉禍而爲福人情失則變安而爲危近年兩廣地方黃蕭養之徒聚衆作耗村峒犴獍縱橫出沒人民被害不可勝言蓋由彼處鎮守總兵并三司官員無事之時既不能撫綏懷來遇警



之際又不能奮勇勦殺惟務苟且因循甚則貪酷虐害以致如斯近該本部叅奏將彼處總兵鎮守等官并加黜罰欽命太子太保兼都察院左都御史王翱總督軍務署都指揮僉事陳旺翁信充副總兵官往彼撫捕賊寇鎮守地方即今事體稍寧人民復業所宜鎮靖撫綏庶幾潛消奸宄今御史張昊奏稱前因誠爲有理合無依擬行移左都御史王翱并陳旺翁信會彼鎮守提督及巡按三司戒飭各該軍衛有司官員務在安不忘危

理常思亂湔滌宿弊惟新政務毋因小利而分擾下人  
毋邀近功而激變猺獞已服者懷之以恩信使彼知所  
感悅未服者振之以兵威使彼知所畏懼務求長治久  
安之計勿爲苟且淺近之圖凡所施行事務必思上不  
負朝廷之倚注下不貽地方之患害如此庶使事體相  
安經久利便緣奉欽依兵部知道事理具題景泰四年  
正月二十六日奉聖旨是欽此

忠肅集卷四